

MARCO NAAJOTASANO JESUCRISTOJINIJI

Carriquia jiyajinia Tiuquinijiona Juan poojotasacari Pueyaso rupaa

(Mt 3.1-12; Lc 3.1-9,15-17; Jn 1.19-28)

1 ¹Pueyaso Niyanu Jesucristojiniijiiri naa coteetasaaquiaari pohuatanutej. ²Tariucuacaanu pueyara Pueyaso sequesano caminiujiunia Isafasri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojijia nojori quiniuria. Isafasri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. ³Na nacanuuiri tojishaanutaniya carriquia jiyajinia. Naa pueya sequeyari: ‘iNia jeenucuaare Jiyaniijia nuu! iNia nuunore maninia, maja shuutiuniu!’”

⁴Quiari naataja, Tiuquinijiona Juanri seetanujuanaa naa miiquiaari carriquia jiyajiniatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—iNioojia nia tacatore sesa nia miiniujiniji, moojinia cua tiuquinijionura niajaniya! iPueyasocua sesa nia miishanojiniji nia jiyanoori puetunujuanaa!

⁵Puetunu Judea jiyajinijinio pueyaja-naari nocua nijioquiaari nojori tojitianura

nojuaja, Jerusalén tiacajinijinio pueyano. Cuno pueya jaara sesa na miishano pohuataquiaari Juan niqiara, Pueyaso niqiarajuhuj, Juanri nojori tiuquinijioquiaari Jordán moojinia.

⁶Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijasano. Na miaquesanoori quiquiaari sequeru, samiyatunio, carriquia jiyajinia na riuriatasano. ⁷Juanri pueya niqiara pohuataquiaari naatej:

—Tamonuuri cua nuhuaji niniutaniya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji. ⁸Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojajinia, na cumaaca nia jitianura, seetanujuanaa maninia miijiaca nia quiniuria.

Jesu tiuquinishacari moojinia

(Mt 3.13-17; Lc 3.21-22)

⁹Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰Jesu tacasacari

moojiniji na tiuquinishaanu nuhuaji, jiyacaritij, nojuajaari jiya cajiniocua niquiquiaari riateyano. Pueyaso Sohuanu niquiriiri nocua roseyano juhua mococoonu. Nocua tiuushiiri. ¹¹Jiyacaritij, jiyocuaaanuji tojishaaquiaariiri Pueyaso pocuaano. Naa Jesu sequequiaariiri:

—iQuiaari Quiyanuniyojua, cua panishano! iJiyanohua quia timitiaanijia!

**Samaruhua jiyaniijia
saniniujishacari Jesu**
(Mt 4.1-11; Lc 4.1-13)

¹²Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara.

¹³Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiriquiaa na tojijiara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

**Jesu coteesacari poonijionu
Galilea jiyajinia**
(Mt 4.12-17; Lc 4.14-15)

¹⁴Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jiitianutaniya na muerasuni.

¹⁵Jesuuri naa sequequiaari pueyatej:

—Nia sequeyanijia, nio pa quishacarin, quiarijiari Pueyaso jiyanooashacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojitiyajaca nia quiniuria.

**Jesu saquirojosacari pueya,
na tarajariquiano**
(Mt 4.18-22; Lc 5.1-11)

¹⁶Galilea caminia shuriuquico Jesu rucuanajosacari, nojuajaari Pedro

niquiquiaari, tarajanu Andrésnio. Nojoriiri shiyaru jaqueroootanaa quiquiaari. Jiyacaritij, nojoriiri shiyaru jaqueroootariquiaa caminiajinia. ¹⁷Jesuuri nojori sequesee:

—iMiji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

¹⁸Nojoriiri ritia na shiyaru tiujiaquiaari. Jesuta quiojiyareeri.

¹⁹Socua shiitianiyojua na taccoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano
(Lc 4.31-37)

²¹Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri.

²²Pueyari jiyanojua jiuujiatequiaari na rootasano nojori tojishacari. Jesuuri juhua jiyaniijiajanana niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonana niishitiojoquiaaricuaani. Nojoriiri saaja Moisés pohuatasanojiniji caminiujiquiaari, pueya niquiara nojori pohuatasacari Pueyaso Rupaa. ²³Samaruraca pueyanoori Pueyaso secojojua tiajinia quiriquiaa tiijihuj. Nojuajaari nacaquiaari:

²⁴—iNazaret tiacajinijinio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. iQuiaacuajaari Pueyaso Niyanu!

²⁵Jesuuri cuno samaru juarii. Na sequereeri:

—iQuia sanaajere! iQuia tohuatare nio pueyanojiniji!

²⁶Jiyacaritij, samaruuri jiyanoehua taraatia miirii cuno pueyano. Jiyanoehua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷Puetunu pueyajanaari shiriqituiquiaari. Tama nojorijiaarijia nequesoreetooquiaari:

—¿Casaatucuaa nioni? iNioruhua quiarinio niishitiojosano! iNio pueyanoqui cumaacaraca! iTaa samaruhua tojitiaa nojori na jiyarosacariiri!

²⁸Pueyari ritia caminiujuquiaari Jesujiniji puetunu Galilea jiyajinijanaa.

Jesu naatanishacari
Simón Pedro reyarucua
(Mt 8.14-15; Lc 4.38-39)

²⁹Jaara tohuareetaquiaariuhua Pueyaso secojojuua tiajiniji, Jesuuri Simón, Andrés tiajinia quiaquiaari Santiagota, Juananio. ³⁰Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeuree nojuaja cusosu mataa. ³¹Jesuuri nocua canuijyaree. Na juaashiquiajiniji cusosu sanaseeri. Na cusunuuri seetanujuanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijiosacari queraatia cusosuhua
(Mt 8.16-17; Lc 4.40-41)

³²Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. ³³Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴Jesuuri queraatia puetunu tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhua. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pahuatasacari Pueyaso
rupaa Galilea jiyajinia
(Lc 4.42-44)

³⁵Jesuuri jiyanoehua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶Na nuhuaji, Simónri Jesu pajenuucua quiojoquiaari, nata quiniaata. ³⁷Jaara na riuriatatuquiaari, na sequetuseeri:

—iPuetunu pueyajanaa quia juuretaa!

³⁸Jesuuri saaja nojori sequeere:

—Pa quiaare juhuari catecanaataja tiacajinia. Tii pa pahuatarejuhua Pueyaso rupaa pueya niqiara. Janiyacuajaari cunora jiyasohuaja tohuataareeni.

³⁹Naacuajitij, Jesuuri puetunu Galilea jiyajinijanaa rucuanajoquiaari. Pueyaso rupaa pahuataquiaariiri Pueyaso secojojuua tiacajiniaqueya puetunu Galilea jiya tiacajinijanaa. Nojuajaari samaruhua tohuatanijioquiaarijuhuaj.

Jesu naatanishacari lepraraca pueyano
(Mt 8.1-4; Lc 5.12-16)

⁴⁰Lepraraca* cusosu pueyanoori Jesuucua catecanoquiaari. Jesu cariquimiai mojoquetaseeri. Na sequeereeri:

—Quiaa jaara paniri, quia naata cua naataniniu cua cusonujiniji.

⁴¹Jesuuri nocua taraajequiaari. Na juaashiquia niaree nocuaari. Na sequeereeri:

—Taaquiriirinj. Quia naataniniu paniyanijia. Quia cuaqueya cuara jeequehuara.

⁴²Jesu jaara naa na sequequiaaritij, na lepraari ritia cushiriqii. Na cuaqueyainiji shaajequiaariiri na cusunu. Na cuaqueyari maninara quiquiaariuhua.

⁴³Na jiyaroyaquishacarijia na naatanishano pueyano, Jesuuri jiyanoehua na rootaquiaari. Na sequeereeri:

⁴⁴—iCua tojiri, majaari pueya quia pohuatanu cua miishano! Saaja pueyacua secojonaa jiyaniijia quia cuaqueya quia niquitishii, na cartenuhua-ra quiajaniya, pueya tajinia quia rucuanefonuhua juhujaniya. Mariyata ritia quia niquitiore quia seru Pueyasoo-cuara catijasocoriquiano. Naa quia miiri taa Moisés niishitiojoquiaaricuajani, puetunu pueyajanaa niishiniuria quiaa tari naatarohua quia cusonujiniji.

⁴⁵Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niquiniu panijia. Cunora, Jesuuri maja tari na naata tiuquiniu quiquiaari juhujaniya tamonu tiacajinia. Nocuai Jesuuri pueya quiaquishaqui rucanejorua. Naajaa, puetunu cuno jiyajiniji pueyajanaari saaja nocua nijioquiaari na niquiniuria.

**Jesu naatanishacari
cumatacuruhuaa cusosu**

(Mt 9.1-8; Lc 5.17-26)

2 ¹Na rucanejonu nuhuaji, Jesuuri Capernaum tiacajinia tiuquiquiaarihua na saquiriojosano pueyata. Pueya jaara niishiquiaari Jesu tari na quijia tiajinia tiuquiriohua, ²queraatia pueyari nocua nijioquiaari cuno tiajinia. Nojoriiri tiaco mishiquiaari, tohuatayajijuhuj. Jesuuri cuno pueya niquiara pohuataquiaari Pueyaso rupaa. ³Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuaa na quiniuucua. ⁴Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuatayaji. Nocuai nojoriiri tia cacojiria cusosu tacataquiaari tacatuhuoco. Nojoriiri tia

nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. ⁵Jesuuri cusosu patanaa pueya niquirii seetanjuanaa nocua tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricuajaniija.

⁶Moisés Rootasanojiniji niishitiojanaari tii cajituriquiaa. ⁷Nojori tojishacari Jesu jiyanoyno cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. iNojuajaari tama na cuaqueyajaaja jiyateya juhua Pueyaso na quiniuria! iCunoori jiyanohua sacuaraatia! iSaaja Pueyaso cutaraari na naata pa jiyanooni!” ⁸Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojiyani?

⁹¿Casaate jiyajenetashiya sequenurani:

“Sesa quia miishano tari jiyanooshaaree?” ¿Mariyata jiyajenetateeri sequenurajuhuj: “Quia sanere. Quia matu quia pataarohua”? ¹⁰Seetanjuanaa nia sequeyanijia, janiyari quiarijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaa cua jiyanooniuriani.

Jiyacaritij, Jesuuri cumatacuruhuaa cusosu sequeree:

¹¹—Cua tojiri. iQuia sanere! Quia matu quia patare. Quia tiajinia quia quiaarohua.

¹²Cusosuuri ritia sanequee. Pueya niquiara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—iMajaari quenaaja pa niquiniu quiquiaari naa miishanotej!

Jesu sequesacari Leví na nuhuajiniuria
(Mt 9.9-13; Lc 5.27-32)

¹³Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitioquiaari Pueyaso rupaa. ¹⁴Na nuhuaji, Jesu quiojosacari na saquiriojosano pueyata cuniquiji, Jesuuri Leví niquimaa cajiyo Roma tiacajinia quijia jiyaniijara cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵Cuno niucuaaja, Jesuuri Leví tiajinia miaqueriquiaa. Leví tiajinia miaquenuuri-quiaajaariuhua queraatia narta cumaneeca masejona. Queraatia tamasaca pueyari nojoritia miaquenuuri-quiaajuhuj, canapue Judiocuaca camarucua sequequiaari sesa pueyatacua-jani. Nojoriiri Jesuta miaquenuuriquiaa, Jesu saquiriojosano pueyatano. Jiyanhua queraatia pueyari Jesu rupuenaa quiriquiaa. ¹⁶Moisés Naajionee-jiniji niishitijona, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari: —¿Casaara nia niishitijona miaqueya cuno cumaneeca masejonaatani, mariyata cuno sesa mijiicataní? ¿Casaara cuno pojoritia na ratuyajaanuhuj?

¹⁷Jesuuri cuno pueya sequesano tojirii. Nojori sequeree miriquiri:

—Jiyotuucaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia mijiicacua. Niquiaari cutaranijia nia sequesano sesa

mijiicacua jiyanooniuria sesa nojori mijiisanonijiji.

Pueya nequesotasacari Jesu, casaara na pueya miaquenu carteyaquiyani, nojori shuquiritiniuria Pueyaso
(Mt 9.14-17; Lc 5.33-39)

¹⁸Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesucua nijioquiaari. Na sequetuseeri:

—¿Casaara quia saquiriojosano pueya carteyaquiyani miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhuj. ¿Casaara naa quia pueya miyaquiyajaanuhuj?

¹⁹Jesuuri nojori riucaaree miriqui:

—¿Masusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹Seetanujanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaaree.

²²Naajuhuj, quiariniacu uva* caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuaan niitiaa uva caacani, shoquenio. Cunora, maninia cutaraari quiariniacu uva caaca shuujionu shoque quiariquiojinia, maja vino* niitiasaanura najuhuanaj, shoquenio.

Jesuuri naa pohuataquiaaritij, pueya na niishitijonura quiarinio na niishitijosa-

noori maja na naata cojitishaanu
tariucuacaanu niishitiojosanota.

**Jesu pueya carojotasacari
trigo samaatenu juuca**
(Mt 12.1-8; Lc 6.1-5)

²³Jesuuri samaatenu juuca quiojoquiaari
cuhuariquiajiniaaco na saquiriojosano
pueyata. Na pueyari jiyacari trigo carojotanu
coteequiaari na miaajenuta. ²⁴Fariseocuaca
jaara na niquiquiaari, Jesu sequetureeri:

—iQuia niquiri! ¿Casaara quia saquiriojo-
sano pueya poonijiya samaatenu juucani?
iPueyaso Rupaajinia, paari piriyojoshiyacua-
jani maja samaatenu juuca pa poonijionura!

²⁵Jesuuri nojori sequereeri:

—¿Majateeri nia serojonu quiquiaari
Pueyaso Rupaajinia pa supuetanaa jiyaniijia
David miishanojiniji, nojuaja jaara
miaajequiaari na cojiniaata, nojori jiitiaaqui-
shacari na coseyaca? ²⁶Cuno quishacari,
supuetana Abiatar pueyacuara secojonaa
jiyaniijia quiquiaari. Davidri tiuquiquiaari
Pueyaso Secojoua tiajinia. Nojuajaari
Pueyasora niqutiosano panjiniji saquiaari.
Cuno panri saaja Pueyaso Secojoua tia
cojuanaa sasocoriquiano quiquiaari. Naajaa,
Davidri na saquiaari. Na neecasequiaarijiaa-
riuhua nata quiniaa pueyara.

²⁷Jesuuri nojori sequequiaarijiuhuj:

—Pueyasoori samaatenu juuca
shipiniquiaari pueyara. Maja cutaraari
Pueyaso shipininiu quiquiaari pueya,
samatenu juucara. ²⁸Naaratej, pueyano cua
quishacari mijiria, janiyari cumaacaraca cua
Quejinijini cua sequenura casaa pa
miiniutianiya samaatenu juucani.
Janiyacuaajaari samaatenu juuca camarnuni.

**Jesu jeecasacari pueyano juaashiquia
cuseetucojuara joojequetano**
(Mt 12.9-14; Lc 6.6-11)

3 ¹Jesuuri Pueyaso secojojua tiajinia
tiuquiquiaariuhua na saquiriojosano
pueyata. Tii quiriqiaari pueyano,

cuseetucojuara joojequetano juaashiquia-
raca. ²Cuniqui quiniaa Fariseocuacaari
shanacutariquiaa na niquiniuria taa Jesu
miiniutianiyanoj. Nojoriiri tama
sequetooreejaaja:

—¿Jesuteeri sesarucouja pueyano
juaashiquia jeecanutaniya samaatenu
juucani?

Nojoriiri Jesuucara saquiriojotanu
paniriquiaa, nojuaja jaara samaatenu
juuca poonijiore. ³Jesuuri jiyacari
sesarucouja pueyano sequereeri:

—Quia sanere. Niya quia nujuasee
canaa tajinia pueya niquiara.

⁴Na nuhuaji, Jesuuri pueya nequesota-
ree:

—¿Casaate samaatenu juuca miishiya-
ni? ¿Paate maninia miyani, paate sesa
miya soj? ¿Pueyanote naatanishiya,
moshiyajanaa soj?

Nojoriiri sanaa niqutiariquiaa saaja,
Jesu sequesacari naatej. ⁵Jesuuri na
shocuaqueya nujuatiuano pueya niquini-
jioree na juaaniutia. Nojoriicua
taraajeriquiaajaariuhuj, cumajiuujiaaca
nojori quiniucua. Majaari nojori
niishiniu paniniu quiquiaari taa Pueyaso
paniya pueyacuara taraajeja pa quiniuriani.
Jesuuri sesarucouja pueyano sequereeri:

—iQuia juaashiquia quia shiitiore!

Na juaashiquia shiitioreeri. iJiyacaritij,
na juaashiquiaari ritia jeequequee!

⁶Fariseocuaca niqishacari naa Jesu
miishanotej, nojoriiri tohuareetaquee na
juaaniutia. Nojoriiri Herodes panijiaa
pueyata pocoojoquiaari ritia, taa nojori
monutaniya Jesuni.

**Queraatia pueya rerequeejosacari
caminia casaqueyaji**

⁷Na nuhuaji, Jesuuri quiojoquiaari
caminiajinia na saquiriojosano pueyata.
Queraatia pueyari na nuhuajiquiaarijiu-
hua Galilea jiyajiniji. ⁸Pueya
niishishacari puetunu Jesu maninia

miishanojinijijianaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhua, Idumea jiyajinijinio pueyano. Nijioquiaarijaariuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhuaj na niquiniuria Jesu. ⁹Nocuaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuaji, maja pueya tanuujunura janiya.

¹⁰Jesuuri jiyacari jiyanoehua queraatia pueya naatanijioriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusunujiniji nojori naataconuhua.

¹¹Samaruhuaraca pueya jaara Jesu niquitiquiaari, nojoriiri nocuara mojqetacoquiaari. Naa nacatuquiaariiri:

—iQuiaacujaari Pueyaso Niyanu!

¹²Nocuaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

Jesu saquiriojosacari doce pueya na pueyajinijinio, na rupaa pohuatariquiano
(Mt 10.1-4; Lc 6.12-16)

¹³Na nuhuaji, Jesuuri tacaquiaari tuhuananuucua. Nojuajaari tiji sequequiaari cana na paniquiaaricuajani. Nocua nijioquiaariiri na jiyaniquishano pueya. ¹⁴Jesuuri doce pueya saquiriojologiaari nata nojori quiniuria. Nojori jiyateereri na jiyaramiquishocoriquiano, Pueyaso rupaa nojori pohuatannura.

¹⁵Nojori niquitioree na cumaacaari, cusosuhua nojori naatanijionura, samaruhua nojori tohuatejonurajuhua. ¹⁶Nioori na saquiriojosano doce pueya sesaca: Simón, Jesuuri na sesojologiaari Pedro;

Santiago, tarajanu Juannio. ¹⁷Jesuuri nojori sesojologiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. ¹⁸Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaa pueya maanujinijinio quiquiaari. ¹⁹Quiquiaarijaariuhua Judas Iscariote, Jesu quiatequiaari mosocoriquianoni.

Judiocuaca camarucua sapojosacari, Jesu samaruhua cumaaca jitiiaa
(Mt 12.22-32; Lc 11.14-23; 12.10)

²⁰Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tiajinia Jesuucua. Naacuajitij, majaari nojori naata miaquenu quiquiaari. ²¹Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaajaarija:

—iJesuqui tari paatecara quirijuhuanajaj!

²²Moisés Rootasanojiniji niishitiojonaa Jerusalén tiacajiniji nijiono pueyari saniniuujia na sequetquiaari Jesujiniji:

—Samaruhua jiyanjia Satanáscujaari cumaaca niquitiorucuaa cuno pueyano. Cunora, samaruhua tohuatanijia pueyajinijiiri.

²³Naaratej, Jesuuri cuno pojori sequequiaari nojori na niishiriojotenura:

—Miji, niya cua tojtiaasee. ¿Pueyano-teeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴Naajuhua, mijiria jiya jiyanjia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioja.

Nojuajaari shocotasaanutaniya. ²⁵Naajaa-riuhua, pueyano jaara tapueyocucata juayonuutare, majaari nojori naata jatiqui quiniu nojori tiajinia. ²⁶Niaari saniniujia cua sequeree, janiyana Satanás cumaacata tohuatanijioquiaa samaruhuani. Satanás jaara naa miiritij, cuno maara tari quiri na shaajasaanurajanaa.

²⁷Naajuhua, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiyaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸Seetanujuanaa nia sequeya cutarani-jia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhua.

²⁹Saniniujia, cante sesa rimiaaqueja Pueyaso Sohuanuucuarani, cuno cutaraa-ri maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano,

Jesu tapueyocucajininijio

(Mt 12.46-50; Lc 8.19-21)

³¹Jiyacaritij, Jesu nucuajari tiuquijio-quiaari, Jesu tapueyocucanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicuaru. ³²Jesu shocuaqueya cajitiuniaari Jesu sequeturee:

—Quia nucuana quia tapueyocucata jati carijiniacuma nujuatiuya. Quia pajenuyaquinia.

³³Jesuuri saaja nojori sequeree:

—¿Cante cua nucuani, cua tapueyocua-cajuhuaj?

³⁴Na nuhuaji, na shocuaqueya cajitiuniaa niquinijioreeri. Sequereeri:

—Nio pueyari cua nucua, cua tapueyo-cucanio. ³⁵Cante cua Que panishano miiijiani, nojuaja cutaraari cua tarajanu, cua rimiatu, cua nucuanio.

Miriqui pohuatasano natoojojua pueyanojiniji

(Mt 13.1-9; Lc 8.4-8)

4 ¹Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanhua queraatia pueyari rerequeejoquiaari nojori tojtianura nojuaja. Boteeri tii cuatariquiaa caminiajinia. Naacujitij, Jesuuri botejinia tacaquiaari. Tii cajishii-ri, caminia casaqueyaji rerequeejono pueya na niishitiojonura tiji. ²Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

³—Nia tojitiare nio sequesano. Tamonu juuca, pueyano na cuhuariquiajinia natoojonuucua quiquiaari. ⁴Na jacutasa-cari, nucuaco totequiaariiri tajaaca. Shuhuari na miojoree. Majaari na moritia-nu quiquiaari. ⁵Tajaacaari totequiaari sai tajiniaqueyajuhua. Majaari cuniqui puera jiya quiniu quiquiaari na maashiniuria. Naacujitij, najuhuaa ritia moritiaquiaa-riiri. ⁶Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷Tajaacaari totequiaarijiuhua riyocuaca tajinia. Jiohuacacaari socua ritia maashiquiaari. Natauri tarinituacuara quiquiaari saniniujia. Naaratej, majaari na muetunu quirii. ⁸Tajaacaari saniniujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhua socua cien jajau tanajajiniji.

⁹Jesuuri nojori sequeeree:

—Cante numaaracani, cuaara cua sequesano tojtiaara.

Casaarate miriqui pohuatasanonni
(Mt 13.10-17; Lc 8.9-10)

¹⁰Na nuhuaji, Jesu quishacari tamajaa-ja, na saquiriojosano doce pueyari na nequesotaquiaari, tamasaca pueyanio. Cuno pojoricuajaari Jesu shuriucua quiriquiaa. Nojoriiri Jesu sequeeree:

—¿Casaa miriqui quia pohuatasano sequenu paniyani?

¹¹Jesuuri nojori sequeeree:

—Pueyasoori nia niishitiojiya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoriiraari miriqui pohuatashiyacujua. ¹²Naacuajitij, nojoriiri cua cumaacata cua miishano niquitiquiaa pueyaracaanu najuhuanaj. Majaari nojori niishiniu na niquishano. Naajuhujaj, nojori jaara Pueyaso Rupaa tojtitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji
(Mt 13.18-23; Lc 8.11-15)

¹³Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanonni? ¹⁴Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuatana. ¹⁵Noojiaqueya pueyari juhua nucuaco toteno jajau. Najuhuaa Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariutiaquiaa. ¹⁶Tamasaca pueyari juhua noo jajau saniniuujia, sai tajiniaqueya

jacutasanotej. Nojori jaara Pueyaso Rupaa tojiri, jiyanohua na timitiaari.

¹⁷Cunoori juhua secaja nujuacaraca moritiano jajau, sai tajinia na moritia-nuucua. Majaari na rishiniu. Naajuhujaj, cuno pueya jaara saniniujiushaare taraatia, jaara naquiya miishaarejuhuaj Pueyaso Rupaa tojijiaca nojori quiniuu-cua, nojoriiri ritia Pueyasooocua tiuuniu tarinitiaja. ¹⁸Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari.

¹⁹Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaarihuaj. Puetunu cunorajanaa, nojoriiri Pueyaso rupaa tojtiaquiaa na numaa shama. Naacuajitij, nojoriiri juhua muetuhuo quiya. ²⁰Noojiaqueya pueya saniniuujia, nojori cutaraari maninia tojtiaja Pueyaso Rupaa. Cuno pueyari juhua cuhuariquia-jinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhujaj, tarajanuuri jiyanohua queraatia muetujua. Naajuhujaj, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-17)

²¹Jesuuri nojori sequeereejuhuaj:

—¿Samaritutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritui jaara noshitishaare, morijiuucua morotashiyari, tiajiniaaco na cuhuatanura maninia.

²²Naajuhujaj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura.

Naajuhujaj, Pueyaso Rupaa jaara nioojiajini jamosaare, juhua muetunutanianiyari puetunu pueya niquishocoriquianojuanaa. ²³Niajaninya, canapueete numaa jiitiaani, nia tojitiare cua pohuatasano.

²⁴Jesuuri naa nojori sequequiaarijiuhujaj:

—Nia niishiri nia tojishano. Nia shanacutajataja, teyanota nia shanacujiquiaa nia niquitiosocoriquianocujani, Pueyasoori cunotaja niaara shanacunutanijajuhujaj. Naacuajitij, niaa jaara capora quiriquia tamasaata, Pueyasoori socua capora quiniutianiya niaarajuhujaj. ²⁵Cante na rupaa tojijiani, socua na niishitiojonutanianiyari. Saniniuuja, canapueete na rupaa tojitiaaquiiani, secaja na niishishanoori puetunu jaariutiasaanutanijajanaa.

Miriqui pohuatasano natau moritianojiniji

²⁶Jesuuri nojori sequequiaarijiuhujaj:

—Nia niishitiojonu saniriiria taa

Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijiuhujaj. Tamonu juuca, na camaru tacatesacariuhua na natasano na niquiniuria, tariucua puereetuucari quiquiaari. Majaari na camaru niishiniu quiquiaari taa na moritiareeni. ²⁸Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimias na noshiniuria. ²⁹Natau jaara noshimia, na senoonaari na senoojua na racatasocoriquiano. Pueyaso muerasuuri naa miishaanutanijajuhujaj.

Miriqui pohuatasano mostaza jajaujiniji

(Mt 13.31-32; Lc 13.18-19)

³⁰Jesuuri socua sequequiaari:

—¿Juhua casaa niquishanote Pueyaso cumaacani? ¿Casaata pa naata na saniniujiuniuni, taa Pueyaso Rupaa poonijia pueya jiuujiajiniani? Quiarijia nia pohuatareeraj. ³¹Pueyaso Rupaari pueya jiuujiajinia quiya juhua mostaza jajau. Mostaza jajauri jiyanojua socua shiitianiyojua puetunu tamasaata jajaujinijijianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiushacari. ³²Mostaza jajau jaara natasaare, maashiyari socua puereetuucara tamasaata nataujiniji. Na cashacucuaari maashiya puereetucucua. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhujaj, na jataniniuria na tojijia, maninia miiija na quiniuria.

Jesu niishitiojosacari pueya saa na miriqui pohuatasanotaja

(Mt 13.34-35)

³³Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴Naacuajitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasanota. Tamajaaja nojori quishacari saniniuuja, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio

(Mt 8.23-27; Lc 8.22-25)

³⁵Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶Cuniquijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniaja, tee nojuaja quiriquiaacuajani. Jesu quiasacari caminia taquijiria, tamasa boteeri nata jaatequetariquiaa-juhuaj. ³⁷Maja puera na quenaacoyaquishacarijia, maruuri paratuta canashiaquiji jiyano-hua niquiaari nojoriicua nojori niuutiasacari. Paratuuri jiyano-hua cajiniuucuatequiaari mohuaca nojori botejiniacumara. Nocuaji na boteeri tari quera tiuquitiariquiaa mohuacata. ³⁸Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequetureeri:

—iNiishitiojonanaa!, ¿majateeri quia puerenuujua paa tari tiuquitiaareeni?

³⁹Jesuuri sanemaa. Paratu sequereeri, caminiano:

—iQuia suraajere! iTariucuaja!

Paratuuri tajimiohua. Caminiaari pootia maquee. ⁴⁰Jesuuri na saquiriojosa-no pueya sequeree:

—¿Casaara nia puereya puerani? ¿Niaateeri Pueyasoo-cua tiuyashijiaa quiyajaaru-huaj?

⁴¹Nojoriiri jiyano-hua shiriiquitiurii. Tama nojoriiaarija sequetooquiaari:

—¿Cantejaaranoni? iParatu, caminiaari na tojirii!

Gerasa jiyajini-jinio samaruhuaraca pueyanojiniji pohuatasano
(Mt 8.28-34; Lc 8.26-39)

5 ¹Na nuhuaji, nojoriiri caminia taquijiria tiuquiiioquiaari, Gerasa jiyajinia. ²Jesu tacasacari botejiniji, nocua niquiaariiri tamonu pueyano raacajiniji, macunucua nucuhua paaquio-saqui. Cuno pueyanoori samaruraca quiquiaari. ³Raacajinia quijia quiquiaari-

ri. Majaari na naata moronu quishaaquiaari quenaaja cumayocua shipinishano casaata. ⁴Pueyari juucua na morojoua, na cashacucua, na juaashi-quiacano. Saaja na turojotajaari. Majaari quenaaja na nujuataja pueyano quiniu quijia. ⁵Pueyaracaanu tuhuananuhuacua rucuanajoquiaariiri, raacajinianio. Na rucuanajosacari sariyacojojuaari, juuca, niucuanio. Tama na cuaqueyajaaja piquijia saitiaari. ⁶Nojuaja jaara Jesu niquiquiaari tucuaaanuji, nocua netequiaariiri. Jesu cariquimijia mojuquetaseeri. ⁷Jesuucuaa nacareeri: —¿Casaacua miji quia niyani, Jesunaa, jiyocuaaanu Quijia Pueyaso Niyanunaa? iQuia secojijanijia maja naquiya quia miiniuria janiya!

⁸Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹Jesuuri na nequesotaree:

—¿Taa sesanaacatequia?

Na riuacuareeri:

—Canaa jiyano-hua queraatiani, cunora cua sesa “Queraatia”.

¹⁰Cuno samaruuri jiyano-hua Jesu secojoriquiaa maja nojori na taanuunura cuno jiyajiniji. ¹¹Cushiyari jiyacari cateca naataja miaquenuuriquiaa tuhuananucari. Jiyano-hua queraatia cushiyari quiriquiaa. ¹²Samaruhuari Jesu secojoree naatej:

—iCanaa quia jiyarore canaa tiuquitia-nura cuno cushiyacua!

¹³Jesuuri samaruhua jiyaroree. Samaru-huari pueyanojiniji tohuareetaquee. Cushiyacua tiuquitiaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacojiniji totesee caminajiniaari. Puetunujuanaari tii shushiniuquiaari.

¹⁴Cushiya cojuanaari jiyacari netecua-turohua na shiriiquiniutia. Na tiacajinia pueya poojotanuusuhua nojori niquisha-

noori, cuhuariquiacajinia quiniaa pueyano. Nocujaji pueyari nijioquiaari nojori niquiniuria casaate quiquiaarini. ¹⁵Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶Jesu miishano niquitiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. ¹⁷Cunora, cuno pueyari Jesu secooteree na quianuhua cuniquiji, nojori jiyajiniji.

¹⁸Jesu jaara tacaquiaariuhua na botejinia, cuno tarijia samaruhuaraca quijia pueyanoori nata quianu paniquiaari juucua. ¹⁹Majaari Jesu paniniu quiquiaari. Na sequeree saajaari:

—Quia quiaarohua quia tijajinia quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

²⁰Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

**Jairo niyatujiniji pohuatasano,
Jesu toque quiana maajijinijijihuhaj**
(Mt 9.18-26; Lc 8.40-56)

²¹Jesu jaara niutiaquiaariuhua botejinia caminia taquijiriohua, queraatia pueyari nocua tiuquijioquiaari na quishaqui. ²²Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojojua tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojoqueta-seeri. ²³Naa Jesu secojoree jiyanoahuari:

—iQuiyatu quera cusoya! iMiji, quia juaashiquia nocua quia niaquee na naatanuhua!

²⁴Jesuuri jiyacari nata quiaaree, na saquiriojosano pueyano. Puera jiyanohua queraatia pueyari na nuhuajiriquiaa. Jesu tanuujuturiquiaari. ²⁵Cuno pueya tajinia quiriquiaajaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari.

²⁶Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhua na cumaneeca puecaquiaariiri na naarajosaaanura juucua. ²⁷Cuno maaji jaara Jesujiniji tojiquiaari, na ninijini na nuhuajiquiaari jiyasohuari. Na tucuaque toque quiasee pueya tajiniaari. ²⁸Cuno maajiiri tama sequequiaarijiaaja: “Janiya jaara quenaaja na toque quiareni, janiyari naatanutaniuhua”. ²⁹Naacuaajitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaarjia: “iCua cusonu tari tajiyaatema!” ³⁰Jesuuri jiyacari niishiqui nojuaja na cumacata cusosu naatanirii.

Cunora, nojuajaari tacareecuaree na niquiniuria pueya. Pueya nequesotareeri: —¿Cante cua toque quiareeni?

³¹Na saquiriojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhua nequesotaariquihua saajuhuj: “¿Cante cua quiareeni?”

³²Jesuuri saaja na shocuaqueya niquini-jioriquiaa, na niquiniuria cante na toque quiareeni. ³³Maajiiri jiyacari tetecariquiaa na puerenuta. Jesu cariquimiaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujunaari. ³⁴Na nuhuaji, Jesuuri na sequeree:

—Sanaanaa, cucua quia tiuuniuucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucua tari tajiyaatemohua quiocuaaji.

³⁵Jesuuri cuno maajicua pocuariquiaa-jaa pueya tiuquijiosacari Jairo tiajiniji. Cuno pojoriiri maaji samiriu que sequetu-see:

—iQuia niyatu tari cusoquee! Maja najuhuana Niishitiojona riniu quia tiajinia.

³⁶Jesuuri nojori sequesano tojirii. Naaratej, maaji samiriu que sequereeri: —iMaja puerenu! iCucua quia tiuuri saaja!

³⁷Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸Nojori jaara tiuquijioquiaari Jairo tiajinia, pueya niquishii nujuquetiuyanoori, sariyocua-tiuyanonio. ³⁹Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojutatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaa-ri Jairo necocuata, tama na pueyajaajanio, cuniqui tii nata quituri-quiaani. ⁴¹Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “iMaaji samiriuniaa, quia sequeyanijia, quia sanere!”

⁴²Jiyacaritij, maaji samiriuri ritia sanequee. Juhucatecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanhua jiuujiatequiaari.

⁴³Jesuuri jiyanhua nojori rootaree maja nojori pohuatanura pueya niquiara na miishano. Saaja sequeeree cutaraari maaji samiriu cuara mianuutesaaria.

Jesu quishacari Nazaret tiacajinia

(Mt 13.53-58; Lc 4.16-30)

6 ¹Jesuuri cuniquiji quiaquiaariuhua tama na jiyajiniohuaaja. Na saquiriojosano pueyari nata quiojoquiaarijiuhuj. ²Jaara quiquiaari samaatenu juuca, Jesuuri tii niishitiojonu coteequiaari Pueyaso secojoja tiajinia. Queraatia pueyari na tojititariquiaa. Nojoriiri jiuujiatequiaari. Tamajaaja sequetoo-quiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuria-ni? ³Nojuacuajaari suruhuatujiini casaa shipinijona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocua: Santiago, José, Judas, Simónnio. Na rimiatuhuari niya quiyajuhuj pa tiacajiniani.

Cunora, majaari nojori tojitianu paniniu quiquiaari Jesu. ⁴Naaratej, Jesuuri nojori sequereeri:

—Pueyari tiquiyocua Pueyaso sequenu panishano caminiujiunia tojinii paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhuj, tama na tiajinia quiniaajaajanio.

⁵Naacuajitij, nocua nojori tiuyaquiniucua, majaari na naata na cumaacata na miinii quiquiaari. Saaja secaja cusosuhucua niojoquiaari na juaashiquiaari, nojori na naatanijionura. ⁶Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura

(Mt 10.5-15; Lc 9.1-6)

⁷Na nuhuaji, Jesuuri na saquiriojosano doce pueya sequequiaari nocua nojori

niniuria. Nojori jiyaramiquiniu coteeree-ri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacaari samaru-hua nojori tohuatanijionura pueyajiniji. ⁸Nojori sequeereeri maja nojori panura nojori panishano, saaja nojori miojotu cutara. Nojori sequeereejaariuhua, maja nojori panura caashoque, coseyaca, cumaneecanio. ⁹Nojori sequeereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰Nojori sequeereejaariuhua:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹Pueya jaara nia tiuquinitianu paniyaquiri na tiajinia, nia pohuatasano nojori tojinu paniyaquishacarijiuhua, niocua cuniquiji quiaare. Niocua nia niohuacaacuaji jiya joocua piitiare nojori niquiara, nojori niishiniuria Pueyasoori nojori saniitionutaniya, na rupaa tojiyashijanucua nojori quiniuucua.

¹²Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuuquiaari pueya tacatonuhuara nojori jiuujia Pueyasoo-cua. ¹³Nojoriiri queraatia samaruhua tohuatanijioquiaari. Naajuhua, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari

(Mt 14.1-12; Lc 9.7-9)

¹⁴Jesu miishanojinijiiri caminiujiushaa-quiaari puetunu cuno jiyajiniajanaa. Naacujitij, Galilea jiya jiyaniijia Herodesri Jesujiniji pohuatasaaquiaarijiuhua. Herodesri cuno sequequiaari:

—iTiuquinijiona Juanqui samiitiaro-huacuaa, cua mosano pueyanotej! Naaratej, cuno Jesuuri cuno cumaacara-cua, jiyajeneta casaa na miiniuria na

cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyano-hua cumaacaraca Jesu quiniuucua. ¹⁵Tamasaca pueyari Jesujiniji sequequiaari tamaatia saniniuujia, nojori jiyajenesacarijiuhua. Naa sequetquiaariiri:

—iNojuacuajaari tariucuacaanu pueyara Pueyaso sequesano caminiujinua Elías!

Tamasaca pueyari saniniuujia naa sequequiaari, nojori jiyajenesacarijiuhua:

—Nojuacuajaari quiarijia nio pa quishacari Pueyaso sequesano caminiujinua pajaniyara, juhua tariucuacaanu pueyara Pueyaso sequesano caminiujinuaajuhua.

¹⁶Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiaro-huacuaaquiiri.

¹⁷Tiuquinijiona Juan moyaquishacarijia, nojuajaari Herodías rupajinia nujuatesaaquiaari. Cuno maaji Herodíasni, nojuajaari Herodes* tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. ¹⁸Nocua, Tiuquinijiona Juanri Herodes nacasujua. Naa na sequejaari:

—iPueyasora, majaari maninia quia jiitianura quia tarajanu niquiocua!

¹⁹Cunora, cuno maaji Herodíasri maja na niquiniu paniniu quijia Tiuquinijiona Juan. Na monu panijaari. Majaari na naata quiquiaari saaja. ²⁰Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojjia pueyano, maja sesa miiijia. Naaratej, Herodesri maninia na cojuateja nujuate-

jojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojiniu maniniucuaaja. Nojuajaari saaja noojia niquijoteja quiquiaari. Majaari na niishiniu quijia taa na miiniutianiyani.

²¹Saniniujia, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajiniinio jiyaniijianucua masuuquiaari, tama na soldadohua jiyaniijianucuaajaajanio. ²²Jiyacaritij, Herodías niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanhua. Nata miaquena pueyari jiyanhua na shuquiritiaquiaarijiuhua. Naaratej, jiyaniijia Herodesri niyacoo sequeree:

—Cua masere quia panishano. Janiycua quia niquitioreni.

²³Herodesri socua puetunu pueya niquiarajanaa na sequerohuacuhua:

—iSeetanujanaa quia sequeyanijia, maja cua sapojonu! Janiyari quia niquitio-nutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niquitio-nutaniyani.

²⁴Niyacoori tohuataquee na nucua Herodías na nequesotanura. Na sequeeseri:

—Cua nucuaana, ¿casaa cua masenutaniya cua quenuni?

Na nucuaari na sequeree:

—iQuia masere Tiuquinijiona Juan naca!

²⁵Cuno niyacoori ritia tiuquiquihua jiyaniijia Herodes quishaqui. Na sequereeri:

—iQuiarijia cua niquitiore Tiuquinijiona Juan naca miacojuajinia!

²⁶Naa jiyaniijia Herodes tojishacaritij, jiyanhua taraajequeeri. Naajaa, seetanujanaa na sequenuucua na masuusano pueya niquiara, majaari tari na naata ruuretanu quiquiaari cuno niyacoo masesano. ²⁷Naaratej, jiyaniijiaari ritia jiyaroree na soldado, Juan naca na niquitionura cuno niyacoo. ²⁸Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niquitiosuhua. Nojuajaari na nucua na niquitiose saniniujia.

²⁹Tiuquinijiona Juan pueya jaara na niishiquiaari, na manuu patuquiaariiri, na jamotusocoriquiano.

Jesu mianuutesacari cinco mil pueya
(Mt 14.13-21; Lc 9.10-17; Jn 6.1-14)

³⁰Jesu jiyaramiquishano pueyari tiuquijioquiaariuhua Jesuucua nojori rucanejonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiusha-nojuanaa, nojori niishitiojosanojinijinio.

³¹Na nuhuaji, Jesuuri nojori sequeree:

—Miji, pueya quiaquishaqui pa quiaare tamaqui, tii pa samaatenura rupaquijia quenaaja.

Jiyanhua queraatia pueyari pueyaraaanu nojoriicua nijioriquiaa.

Tamasacaari quiojoriquiohuacuaa.

Tamasacaari saniniujia shusha tiuquijioriquiaacujia. Naaratej, majaari jeya nojori quiniu quiquiaari na miaquenura quenaaja. ³²Jiyacaritij, Jesuuri saaja na jiyaramiquishano pueyata quiaquiaari botejinia, pueya quiaquishaqui.

³³Queraatia pueyari saaja nojori niquitiorii quiaano. Cuno pojoriiri Jesu niishitiquiaari. Naaratej, puetunu caminia shuriuquico tiacajiniijianaa pueyari netecuatiquiaari. Nojoriiri Jesuucuaaji cutesee. ³⁴Jesu rosesacari botejiniji, saaja queraatia pueya niquiriri-

ri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua* quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani.

³⁶Pueya quia sequere, nojori cuaara quiojooa cateca naataja tiacajinia, na miaquesocoriquiano nojori masenura tii.

³⁷Jesuuri nojori riucuree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririjanaa? iPa mianuutenura nojori, panishiyari dosciento cumaneeca! Majaari pa jiitianu.

³⁸Jesuuri nojori nequesotaree:

—¿Taa pan nia jiitiaani? Nia niquishitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajania.

³⁹Jesuuri jiyacari na pueya sequeree nojori cajitijionura pueya jiyasocujajinia, na mianuutesocoriquiano. ⁴⁰Pueyari cajituriu cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaree nojori mianuutesaanura.

⁴¹Jesuuri cuno pan pataree, sapitiaajanio. Na nuhuaji, jiyocuaaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreejaariuhua puetunu pueyarajanaa. ⁴²Puetunu pueyajanaari maninia miaquenuquiaari. Maninia tooquioreejaariuhua. ⁴³Na

nuhuaji, doce canaasatuuri mishinijosaa- quiaari pan raacuata, sapitiaaja raquiquiatanio. ⁴⁴Cinco mil pueyari cuno panjiniji miaquenuunaa quiquiaari.

**Mohuaca caco Jesu
rucuanenujiniji pohuatasano**
(Mt 14.22-27; Jn 6.16-21)

⁴⁵Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacari- tij, Jesuuri pueya sequeriquiaa nojori quiojonuhua na tiacajiniohua. ⁴⁶Pueya jaara tari quiojoquiaariuhua, Jesuuri tuhuananuucua tacaquiaari tii na secojonura na Que Pueyaso. ⁴⁷Jaara niniquiaari, boteeri tari caminia jiuuji- ajinia jaaretariquiaa. Jesuuri juhuanajuaja na jateesaqui quiriquiaajaa. ⁴⁸Jesuuri nojori niquiquiaari najuhuaana juaarioco- nuyano. Majaari nojori naata jaaretanu quiriquiaa, puera paratu piyarojosacari nojoriicua. Quera juhuaquenu panisha- cari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹Nojori jaara na niquitiu- quiaari mohuaca caco canujiyano, nojoriiri na jijanitiuquiaari samaru. Nocuaji sariyocuatereeri. ⁵⁰Puetunu nojorijianaari na niquituriu. Shiriituriu- riiri. Jesuuri ritia pocuaree. Nojori sequereeri:

—¿Casaara nia puereyani? iNioojia nia cumaquiri! iMaja pueretunu! Janiyacua- janijia.

⁵¹Botejinia tacasee nojoriicuaari. Paratuuri jiyacari pueyajequee. Nojoriiri na shootiariquiaa tacuriitia, jiyano- hua na jiuujiatenuta. ⁵²Nojoriiri juhuanajuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiacaari juhua ninishiqui quiquiaari- jia.

Jesu naatanijosacari cusosuhua

Genesaret jiyajinia

(Mt 14.34-36)

⁵³Jesuuri na pueyata caminia niuutia-quiaari. Tiuquijioseeri Genesaret jiyajinia. Nojoriiri tii morotasee na bote. ⁵⁴Nojori jaara tohareetaquiaari botejini-ji, cuniquijinio pueyari ritia Jesu niishiquiaari. ⁵⁵Pueyari jiyacari netecua-tuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara patootasaaquiaari na matucujinia tee Jesu quiriquiaa na rucuanijosacari nojori jiyajiniacuajani. ⁵⁶Tiquiyocua Jesu rucuanijosacari, cusosuhuari nocuaji niojotasaaquiaari nucuaco, tuhuaqui tiacajinia, queraatia shiitianiyojua tiacajiniajuhua, cuhuari-quiacajinianio. Pueyari Jesu secojoree cusosuhua na quiatenura quenaaja na toque casaca. Canapute na toque quiaquiaarini, puetunu nojorijianaari na cusonujiniji naatacoquiaariuhua.

Casaate sesoriquiaari pa

jiyateja Pueyasorani

(Mt 15.1-20)

7 ¹Jesuucua catecanoquiaariiri Fariseocuaca, Moisés Rootasanojiniji niishitiojanaano, canapute Jerusalén tiacajiniji nijioquiaaricuajani. ²Cuno pojori quishacari tii, nojoriiri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyanjia, nojori rucuanijosacari sesa mijiaca pueya tajinia, sesa nojori quiniu na naata nojoricua pacunu. Nojoriiri cunora shuquitianu jiitiquiaari, nojori jiyanjishacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. ³Cuno Fariseocuaca, puetunu narta Judiocuacajanaano, nojoriiri maja na cartenu quijia

tariucuacaanu nojori supuetanaa niishitiojosano. Naaratej, majaari nojori miaquenu quijia shuquitioo. ⁴Naacuajitij, nojori jaara miaquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jiyaniquiaa, sesa nojori quiaquiniuucuaaji Pueyaso niquiaara, nojori cuaara na ratujua jeequejooora, pataco, coshi, na maquetucuanio. ⁵Naaratej, Fariseocuaca, Moisés Rootasanojiniji niishitiojanaano, nojoriiri Jesu nequesotaquiaari:

—¿Casaara quia pueya tojitiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶Jesuuri cuno pojori riuquaree:

—iNiaari sapuenu juhua maninia pueya niquishano! iNiaacuajaari seetanujanaa sesa mijiaca! Pueyaso sequesano caminiujunia Isafasri maninia sequequiaari njajaniyajinijicuaaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuaacaanu quia janiyajiniji. ⁷Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

⁸Niaari cua pueya pocuariquiaa.

¿Nijajaniyariuhua? ¿Casaara Pueyaso sequesano nia tojiyaquiquiaanjia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

⁹Jesuuri socua naa sequequiaari cuno pojoritij:

—Tama nia miiniu jiitishanoocua nia miiniurijaaja, iniaari Pueyaso sequesano

shocortaa saaja! ¹⁰Moisécuaajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuaara mosaaria”. ¹¹Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu nijaniya cua casamitia. Janiya tari Pueyasora jiyateree puetunu cua jiitiasanojuanaani”. ¹²Niaari sequequiaajuhuaaj, pueyano jaara naa sequeretej, maniniacuaja maja na naacutanura na que, na nucuanio. ¹³Naacujitij, niaari Pueyaso sequesano shocortaa saaja, tama nia niishishanojuaja nia miiniuria najuhuanaj. Cuno nia niishishanocuaajaari saaja nia supuetanaajiniji caminiuijushano. Niaari socua queraatia casaa miiquiaa juhua cunojuhuaaj.

¹⁴Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu nijaniyajanaa, maninia nia niishiniuria. ¹⁵Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. ¹⁶Cante numaaracani, nojuaja cuaara tojitiaara cua sequesano.

¹⁷Jesu jaara tiujiaquiaari cuno pueya, tiajiniaaco tiuquiarohuari. Na saquiriojosano pueyari tii na nequesotaree pueya na niishitiojosanojiniji. ¹⁸Jesuuri nojori sequere:

—¿Niaateeri cua sequesano niishiyaquiyajuhuaaj? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. ¹⁹Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiari pa marecuhuacuma.

Nio sequesanota, pueya niishitiojori-quiaari, puetunu miaquesanojuanaari

maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰Jesuuri sequereejuhuaaj:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹Pueyano jiuujiajiniji supueya cutaraari sesa niishiriojosano, sesa na miiniuria. Naacujitij, pueyanoori na camishoo maajipohua numuetucujua, seya numuetucujajuhuaaj. Tamonu pueyano casami nohuasejoquiaari. Pueya moquiaaariuhuaaj. ²²Narta pueyano niquiocua numuetucuaquiaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiaquiaari na miiniu jiitishanota. Narta pueyano miananajoquiaari. Tamonuucuaara tonujuquiaari. Naajuhuaaj, saaja tama na cuaqueyajaaja shuquiritiaja quiquiaari. Juhuaajaniya sesa miiquiaaariuhuaaj, moseeca na quiniuucua. ²³Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaara pueya jiyateja Pueyaso niquiara.

Taatu tiuushacari Jesuucua (Mt 15.21-28)

²⁴Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. ²⁵Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiaari. Na cariquimijaji mojoquetaseeri. ²⁶Cuno maajiiri Sirofenicia jiyajininio taatu quijia. Jesu secojoseeri samaru na tohuataniniuria neyatujiniji. ²⁷Jesuuri maaji sequeree miriqui:

—Quia tarinitiare, muerasu cuaara coteenu miaquenuura. Majaari maninia

muerasu pa jaariutianura na miaquesano, sareyacari jatasocoriquiano.

²⁸Maajiiri Jesu riucuaaree:

—Jaa, Jiyaniijianaa. Naajaa, sareyacua-jaari miaqueja cariquiacoji tatucuaja, muerasu totinijiosano miaquesano shiriya.

²⁹Jesuuri na sequeree:

—iQuiaacuaja maninia cua riucuaaree! Quia tacateyarohua. Samarucuajaari tari tohuataree quia niyatujiniji.

³⁰Maaji tiuquishacariuhua na tiajinio-hua, neyatu riuriatasuhuari na maquetujinia mataano. Samaruari tari tohuatano quiriquiaa nocuaji.

Jesu jeeacasacari numueeju, tiquia pueyano

³¹Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³²Tii na quishacari, nocua jaatucusaquiaariiri numueeju, tiquia pueyano. Na jaatucunaari Jesu secojotiquiaari na juaashiquia na nianura nocua, na jeecanura cuno pueyano. ³³Jesuuri pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniaaja riocoreeri. Na riacau cojuata pocuaashijia niti quiareeri. ³⁴Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—iEfata!

Nioori pueyano rupaajinia sequeya: “iQuia riaterel!”

³⁵Jiyacaritij, numueeju numaari riatequequee. Na nitiiri jeequequeeju-huaj. Ritia pocuaquee maniniaari.

³⁶Jesuuri cuno pojori rootaree maja nojori pohuatanura na jeeacasano pueyanojiniji tamasaca niquiara. Nojoriiri saaja tiquiyocua pohuatanuquiaari. Naa Jesu rootasacari na naatanijiosano

pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. ³⁷Pueyari jiyanhua jiuujiatequiaari Jesu miishano na niquitiushacari. Tama nojorijiaarjia sequetooquiaari:

—iPuetunujuanaa miya maniniaari! Numueejunucua jiyateya tojitiajacaraari. Tiquianucua pohuateyajaariuhuaj.

Jesu mianuutesacari cuatro mil pueya
(Mt 15.32-39)

8 ¹Jiyacaritij, jiyanhua queraatia pueyari rerejoquiaari Jesu na tojitianura. Majaari nojori jiitanu quiquiaari casaa quenaaja na miaquetu-socoriquiano. Jesuuri na saquiriojosano pueya piirri. Nojori sequereeri:

²—Nio pueyacuara taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³Janiya jaara nojori jiyaramiquiriohua na tiajinia miaqueyo-juani, nucuaaco cusojoniuyarohuacua. Noojiaqueya nojorijinijinioori niyara nijiorucuaa tucuaaanuji.

⁴Na saquiriojosano pueyari na riucuaaree:

—¿Paatucua taa miaquetera nojori niyani, pueya quiaquishaquini?

⁵Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

⁶Jesuuri na pueya sequeree, nojori cuaara sequeera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniujuia pueya na serotaree puetunujua-naa. ⁷Secaja sapitiaaja jiitiatuquiaajaariuhuaj. Jesuuri socua nocuara secojorohuacuhua. Na nuhuaji, na pueya sequereeri nojori niquitiojonura

pueya. ⁸Puetunu pueyajanaari maninia miaquenuuree. Tooquioreejaarihuaj. Miaquesano cureenota mishinijosaaquiaa-riiri siete canaasatu. ⁹Na miaquenaa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhua. ¹⁰Na nuhuaji, Jesuuri botejinia tacataquiaari na saquirijosano pueyata. Quiaareeri Dalmanuta jiyajiniara.

Fariseocuaca niquiniu panishacari Jesu miishano Pueyaso cumaacata
(Mt 16.1-4; Lc 12.54-56)

¹¹Fariseocuacaari Jesuucua tiuquijio-see. Nata juayonuutaseeri. Nojori saniniujiuniuria Jesu, nojoriiri na sequeree juucua cuaara nojori niquisho-coriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. ¹²Jesuuri noojia niaree na taraajenuta. Sequereeri:

—¿Casaara nio pueya niquiniu paniya Pueyaso cumaacata miishanoni? Seetanujuanaa nia sequeyanijia, majaari cua niquitiniu quiniutianiya nijaniya cua cumaacata cua miishano.

¹³Jiyacaritij, cuno pojori tiujiaqueeri. Na pueyata botejinia tacataarohuari. Caminia taquijiria niutiaareeri.

Jesu numootesacari na pueya Fariseocuaca niishitijosanoocuaji
(Mt 16.5-12)

¹⁴Jesu pueyari na coseyaca niyajetatu-quiaari. Nareja niquiriyatujua panniyojua jiitaturiquiaa botejiniaari. ¹⁵Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijihuaj.

¹⁶Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa sasocori-quiano.

¹⁷Jesuuri na saquirijosano pueya niishirijosano niishiquii. Nojori sequereeri:

—¿Casaara naa nia niishiriojiya pan nia jiitaaquishacarini? ¿Majateeri juhuanajuaja nia niishiniu tamonu juuca cua miishanojiniji? ¿Niaateeri cumajiuu-jiaacato, maja nia niishiniuria?

¹⁸¿Majateeri cua miishano nia niquiniu quiquiaacuaja nia namijiaa? ¿Majateeri nia tojinu quiquiaa nia numaatajuhuaj? ¿Niaateeri ritia niyajetarucuaa cua miishano? ¹⁹Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riuquaree:

—Doce.

²⁰—Naajuhuj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riuquaree:

—Siete.

²¹Naaratej, Jesuuri nojori sequeree:

—¿Majateeri juhuanajuaja nia niishiniu naa cua miishanojinijitij?

Jiyacariti nojoriiri Jesu sequesano niishiquii.

Jesu jeecasacari cariojuaru pueyano, Betsaida tiacajinia

²²Na nuhuaji, Jesuuri Betsaida tiacajinia tiuquijioquiaari na pueyata. Tii na quishacari, Jesuucua jaatucusaquiaa-riiri cariojuaru pueyano. Pueyari Jesu secojotujuiaari cuno cariojuaru namijia na quianura quenaaja. ²³Jesuuri cariojuaru quiaree na juaashiquiajiniji. Tiaca jiaquiria na jaatucuyareeri. Cariojuaru namijia piquiojoree na riacautaa. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

²⁴Cariyojuaruuri niquiniu sanirii. Jesu sequereeri:

—iJaa! iPueya niquiyanijia, juhua nacuhua rucoyano!

²⁵Jesuuri socua pacuterohua na juaashi-quia nianu cariyajuaru namijiaacua. Cariyojuaruuri niquiniu saniriohuacuhuj. Jiyacaritij, tojetaarucujanaa maninia niquijiaa quiquiri. ²⁶Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pohuatanura cua miishanojini quiajanিয়া.

Pedro sequesacari, Jesu seetanujuanaa

Pueyaso Jiyarosano

(Mt 16.13-20; Lc 9.18-21)

²⁷Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipo tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸Nojoriiri na riuquaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuuja quia sequequiaacujua quiaanaari supuetana Elías. Naajuhuj, tamasaacari quia sequequiaa, quiaa naasucuaanari tariucuaaanu pueyara Pueyaso sequesano caminiuijuna, samiitianohuatuhuj.

²⁹Na nuhuaji, Jesuuri nojori nequesotaree:

—¿Niajanियarijiaataj, taa nia sequeyani, cante janiyani?

Pedroori na sequeree:

—Quiajanियacuaja Cristo, Pueyaso Jiyarosano.

³⁰Jesuuri nojori rootaree maja nojori pohuatanura tamasa niquiara nojuajini-ji Pedro niishishano.

Jesu numootesacari na pueya,

nojuaja mosaanutaniya

(Mt 16.21-28; Lc 9.22-27)

³¹Jiyacaritij, Jesuuri na pueya niishitiojonu coteequiaari tama nojuajiniijiaaja, taa Pueyaso Niyanu miishaanutaniya jiyanhua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutianiya, pueyacuara Pueyaso secojonaa jiyaniijianucujuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutanuihuani.

³²Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqi na nacasureeri maja naa na pocuanuratej. ³³Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—iCua shuriucuaaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

³⁴Naa na sequenu nuhuajitij, Jesuuri na saquiriojosano pueya piirii, puetunu cuniqi quiniaa pueyajanaanio. Nojori sequereeri:

—Pueyano jaara cua tojjiaa quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucua panitiaara tama na cuaqueyajaaja. ³⁵Saniniuuja, cante tama na cuaqueyajaaja shuquiritini panijiani, na nuhuaji, nojuajaari jiyanhua taraatia quiniutianiya pueyaracaanu. Saniniuuja,

cante tama na cuaqueya panitíaa cua panishano na miiniuriani, na pohuatanu-ra janiyajiniijiihuuaj, cuno pueyano cutaraari pueyaracaanu quiniutianiya shuquiriaatia. ³⁶¿Niaarate maninia, pueyano jaara puetunu nio jiya casamijianaa jiitiare, na nuhuaji na sohanu jaara jatasaa-re mani quiquioj-nia pueyaracaanura? ³⁷¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸Cante cua rupaa pohuatanu caririquiya sesa miijiaa pueya niquiara nio jiyajiniani, janiyari nojori caririquiniutianiyajahuaj. Naajuhuj, cante caririquiya mijiria quiniiaa niquiara sequenurani, janiya nojori jiyaniijiani, janiyari cua tacatesa-cariuhua nojori caririquiniutianiyajuhuj. Janiyari jiyacari cua Que cumaacata jiyocuacaanuji tacatenutaniuhuani, maninia miijiaa cua Que seyatajuhuaj.

9 ¹Jesuuri nojori sequequiaarijuhuaj: —Seetanujuanaa nia sequeyanijia pueyanaa. Noojiaqueya niya quiniiaajinijio quiarijiani, majaari nojori cusonuunu quiniutianiya juhuanojuaja, nojori cuaara niquirijiaatijia Pueyaso cumaaca tiuquiyano cucua, na muerasu jiitiariquianoni.

Jesu jatasacari shacantuucara
(Mt 17.1-13; Lc 9.28-36)

²Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhuananujiniji, na cuaqueyari tamaatiuucua jataquiaari nojori niquiara. ³Na toqueeri shacantu-quera jataquiaari, socua jiyano-hua cohuajara sohanatuujiniji. Nio jiyajinia toqueya jeequejonaari maja na naata jiyano-hua cohuajaquera toque na jiyatenu, taa Jesu toque jataquiaaricuaa-

ni. ⁴Jiyacaritij, nojoriiri supuetana Elías niquitiuquiaari, supuetana Moisésjuhuaj, Jesuta pocoojyano tii. ⁵Jiyacaritij, Pedroori Jesu sequeree:

—Niishitiojonanaa, icanaa namitia niya quiyani! ¡Canaacua niaacuaji suhuorojoreni: quiaara, Moisésra, Elíasranio!

⁶Jesu pueyari shiriiquitiuriquiaa. Nocuaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani. ⁷Jiyacaritij, jiyocuacaanuji cohuaja najacaari nojoriicua rosequiaari. Cohuajaari nojori mishiquiomaa. Cohuaja najacajiniji, Pueyasoori tojishaaree pocuaano. Naa sequequiaaritij:

—iNiocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸Jiyacaritij, nojori jaara ritia niquinijio-nuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

⁹Nojori rosetasacariuhua tuhuananuucocoji, Jesuuri nojori rootaquiaari maja nojori pohuatanuhuara tamasaca niquiara nojori niquishano. Jesuuri nojori sequequiaari cuaara noojiajinia racatatuura, nojuaja jaara samiitiarohua-jaatijia. ¹⁰Cunora, tama nojorijiaarijia maninia racataquiaari noojiajinia nojori niquitiushano. Maja cutaraari nojori niishitiumu quiquiaari, casaara naa Jesu sequeree nojorini “cua samiitiasacariuhua”. ¹¹Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianihuua Pueyaso Jiyarosocoriquianoocuaji?

¹²Jesuuri nojori riuuaree:

—Seetanujuanacuacuaquiniatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuacaanu

Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutanijajuhua”. ¹³Janiyari seetanujuanaa nia sequeyani, Elfascuajaari tari niquiaari. Pueyari naquiya na miiquiaari taa nojori paniquiaaricuajani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuanaa tari naa miishaaquiaariiri.

**Jesu tohuatesacari samaru,
caya samijiajiniji
(Mt 17.14-21; Lc 9.37-43)**

¹⁴Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quituriquiaajaariuhua Moisés Rootasanojiniji niishitiojanaa. Nojoriiri Jesu pueyata juayonuutariquiaa. ¹⁵Pueya jaara Jesu niquituiquiaari, puetunu pueyajanaari nocuaji jiuujiatequiaari. Nojoriiri nocua netecatuquiaari na saruhuatanura. ¹⁶Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷Tamonu cuno pueyajinijinioori Jesu riuquaree:

—iNiishitiojonanaa, quiocua nitiaaree quianunijia! iSamaru jiitiaano! iSamaruuri na jiyatequiaari tiquiaari! ¹⁸Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miaquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quiyaree. iSocua piriuiquiniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹Jiyacaritij, Jesuuri naa sequeree:

—iNiaaqui Pueyasooocua tiuyashijiacaja! ¿Janiyatucua pueyaracaanu nia

jiitiriqiuani? ¿Janiyateeri pueyaracaanu nia rejeretanutaniyajaaniuhua? iMiji nia jaatucure cuno caya samijia!

²⁰Nocua jaatucusaareeri caya samijia. Samaru niquishacari Jesu, caya samijia miirri taraatiaari. Caya samijiaari pojoquee Jesu niquiaari. Tii taquiriocuariquiaari. Na rupaamajiiri cushaariquiaa.

²¹Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riuquaree:

—Na naatujajiniji naa quijiajuhuanaaj. ²²Na cusojuanura juucua, cuno samaruuri sequeyarucua na pojotequiaa manijinia, moojiniajuhuaj. Naaratej, ijaara quia naata quiri, canaacua quia taraajere quenaaja! iCanaa quia naacure!

²³Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasooocua tiuya noojiata seetanujuanaani, nera miishiyari puetunu na panishanojuanaa.

²⁴Jiyacaritij, caya samijia queeri nacaree:

—iJaa, quiocua tiuyanijia! iCua naacure socua cua tiuuniuria quiocua!

²⁵Jesu niquishacari queraatia pueya nocua rerequeejiano, ritia samaru sequereeri:

—iTojiyashijia, tiquia samarunaa, janiya quia sequeyani, quia tohuatare nio caya samijiajiniji! iPuetunu quia tohuatarejanaa! iMajaari socua quia tacatenuhua, nocua quia tiuquiniuhua!

²⁶Samaruuri sariyocuaquee. Caya samijia taquiriocuaterohuariuhua. Na tohuatesacari caya samijiajiniji, juhua macu na tiujiaqueeri. Nocuaji, queraatia na niquitianaa pueyari sequequiaari:

—iJuaj! iTari cusoquee cutaratej!

²⁷Jesuuri na juashiquiajiniji na quiaree. Na sanareeri. Caya samijiaari juhuajaniya nujaquiaariuhua.

²⁸Na nuhuaji, Jesuuri tiaco tiuquitiaquiaari na pueyataja. Tamajaaja nojori

quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucuaree:

—Jiyano samaruuri na naata tohuatani-shaanu cutara saaja jiyanoehua Pueyaso nia secojonuta nia miaqueyaquiniutia.

Jesu pohuatanu pacutesacariuhua nojuaja mosaanutaniya

(Mt 17.22-23; Lc 9.43-45)

³⁰Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojori-quiaari. Naa nojori sequereeri:

—Janiyari pueya niqutiosaanutaniya-ni, nojori miiniuria janiya taa nojori paniyacuajani. Nojoriiri cua monutaniya. Jiuujianaraca juucajiniya, janiyari samititanutaniuhuanu.

³²Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijiajanaa cutarani?

(Mt 18.1-5; Lc 9.46-48)

³³Nojoriiri Capernaum tiacajinia tiuquijiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴Nojoriiri saaja sanaajetaquee. Na juayonuutanujiniji niishituriquiaacuajaa-ri. Nucuamaji, nojoriiri riutioconeetariquiaa teyano nojorijinijinio-te socua tojishano pueyanoni. ³⁵Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria

juhua serura, narta pueya na naacunura puetunujuanaa.

³⁶Na nuhuaji, Jesuuri mueya nujuate-quiaari nojori tajinia. Cuno mueya patee nojori niquiaaraari. Na pueya sequereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhua. Cante cua maseyani, majaari saaja na masenu janiya. Jiyocua-caanu Quijia cua Jiyarona maseyajaariuhua.

Tamonu pueyano tohuatanijiosacari samaruhua Jesu cumaacata

(Mt 10.42; Lc 9.49-50)

³⁸Tamacari, Juanri Jesu sequereeri:

—iNiishitiojonanaa, canaari tamonu pueyano niquiriini quia sesa jiyaniquia-no samaruhua na tohuatanijionura pueyajiniji! Nojuajaari maja pajaniyajini-jinio. Nocuaji, icanaari na tenuityeeni maja socua naa na miiniuriatej!

³⁹Jesuuri nojori sequereeri:

—¿Casaara nia tenuityeeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰Nia niishiri, cante maja pa paracani, nojuajaari pa jiyano. ⁴¹Nia rucuanejosacari, cante nia raateya mohuacaniyojua na paniniutia janiyani, cua pueya nia quiniucuaajuhua, Pueyasoori saniniujia maninia casaa na niqutionutaniya na jiitiasanojiniji.

Puereeta quiniutianiyari sesa miijiacara

(Mt 18.6-9; Lc 17.1-2)

⁴²Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujau saajia jaara morotasaare na riquiajiniji, caminia queronijinia jartasocoriquiano. ⁴³⁻⁴⁴Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijia, nia juaashiquia nia

rashiquiare juhuari niaa mariqui mani quiquiojinia jatasareeri, sesa mijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataaanura caapiquiquiojuata? Jiyanoehua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶Naajuhuaaj, nia niohuaca jaara nia jiyatere sesa mijiaara, nia rashiquiarenoj maja nia jataaanura mani quiquiojinia. ¿Niaateeri paniya tii nia jataaanura caapiquiniocuata, pueyaracaanu tii nia saniitiosaanura? Jiyanoehua socua maniniaari niquiniocuata Pueyasoocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸Naajuhuaaj, nia namijia jaara sesa miitiriquia niajaniya, nia jiaterenoj. Naa nia tarinitiare sesa nia miiniu, maja nia jataaanura caapiqui namijiaata pueyaracaanu mani noshishaqui. Sesa mijiaacaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshiya. Majaari na maquesanu. Jiyanoehua socua maniniaari nia tiuquiniuria Pueyasoocua niquiriyatujua namijiaata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanoehua na miiniu panishano, cuno jaara sesa mijiaara jiyateriquia nojori.

⁴⁹Jesuuri socua niishitiojorohua:

—Puetunu Pueyaso muerasujuaanaari saniniujiushaanutaniya juhua manitia, taa shu caquishiyacuaani na moqueyaquiniuucuai. ⁵⁰Naajuhuaaj, shoniiri jiyanoehua maninia, shu moqueyaquiniuucuai. Saniniuujia, shoni jaara shaacara quiri, ¿maatucua taa tiquirriquia

quirioehua saajaniuhuaaj? Maja na naata. Naajuhuaaj, Pueyaso cumaaca nia jiitiare nioojiajinia, niaa mariqui najuhuaana quijia quiriiri juhua Pueyaso niishiyashijia pueya. Naajuhuaaj, jiyanoojiaa nia quiri, jatiqui nia quiniuria shuquiriaatia.

Jesu niishitiojosano maja pueya cartenura necocua
(Mt 19.1-12; Lc 16.18)

10 ¹Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijiriajuhuaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ²Jiyacaritij, noojiaqueya Fariseocuaacaari Jesuucua nijioquiaari na saniniujiuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree: —¿Maninate pueyano cartenura necocua?

³Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniani?

⁴Cuno pueyari Jesu riucaaree:

—Moisésri pa sequequiaaricuaa, pueyanoori na naata necocua cartenu. Neyaca cuuara coteenu na niquitioora na cartetaja naajionee, necocua na cartenu. Moisés cuuajaari naa pa sequequiaaritij.

⁵Jesuuri cuno pojori sequeeree:

—Moisésri naa sequequiaari niajaniatej, pueyaracaanu cumajiuujiaaca nia quiniuucua, nia niquiocuaacua taraajeyashijia nia quiniuucua juhuaj. ⁶Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷Naaratej, pueyanoori na queya tiujianutaniya necocuara na caminiuria. ⁸Nojori jaara camitioore, nojoriiri juhua niquiriyatujua pueyanora quiqui. Naacujitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹Cunora, pueyano cuaara necocua carteyaquiiria, Pueyaso rupuetootesano nojori quiniucua.

¹⁰Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani. ¹¹Jesuuri nojori sequeree:

—Cante necocua carteya tamonu maajitia na caminiuriani, cuno pueyanoori jiyanoohua sesa miya coteenu necocua. Pueyasora, naa na miishacartitij, nojuajaa-ri juhua narta pueyano niquiocuata quijia. ¹²Naajuhua, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhua.

**Jesu niasacari na juaashiquia
naatujooriicua**

(Mt 19.13-15; Lc 18.15-17)

¹³Na nuhuaji, Jesuucua jaatucunuusaa-quiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. ¹⁴Jesu jaara na niquiquiaari, juaaquiiri. Nojori sequeree-ri:

—iNia tarinitiare naatujoori cuaara niiria cucua! iMaja na tenujunu! Canapuee Pueyaso muerasura quiniu panyani, nojori cuaara juhua nio naatujooriria jataara. ¹⁵Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia.

Saaja naacujiti niaari Pueyaso pueyara jiyatesaanutaniya cutara, pueyaracaanu Pueyaso jittiasano nia quiniuria.

¹⁶Jesuuri jiyacari cuno naatujooriniy-
jua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

**Jiyanoohua casamiriaca mashaja
pocoijosacari Jesuta**

(Mt 19.16-30; Lc 18.18-30)

¹⁷Quera Jesu quianu panishacari quiniquiji, nocua netequiaariiri tamonu pueyano. Jesu cariquimijia mojoqueta-seeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹Quiaacuaajaari Pueyaso niishitiojosano niishiya.

Moiséscaajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujunu sapojonuta. Maja cuaracashijionu. Quia queya tojjia quia quiriquia”.

²⁰Pueyanoori Jesu riucaaree:

—Niishitiojonanaa, janiyacuaajaari puetunu cuno rootasanojuanaa tojjia pueyaracaanu cua naatujuajinijini.

²¹Jesuuri na paniniutia na niquirii. Na sequereeri:

—Juhuanoujaaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niquitiojocoo. Na nuhuaji, casamijiuniucua nareja quia niquitiore quia masesano cumaneeca quia casami sami. Naacujitij, quiaari quia casami jittianutaniya jiyocuaanu Pueyaso shuriucua. Na

nuhuaji cutara, quiocua nimiohua cua nuhuajiriquiano.

²²Cuno pueyano jaara toji quiaari naa Jesu sequesante, jiyano taaajequeeri. Na taaajenuta quiaacua na tiajiniaari. Nojuajaari jiyano casamiriaca pueyano quiaari. ²³Na nuhuaji, Jesuuri na shocuaqueya niquini-jioee. Na saquiriojoso pueya sequeeri:

—iJiyano jiyajeneta cutara casamiriaca pueyano quiniuria Pueyaso pueyano!

²⁴Na saquiriojoso pueyari shiri quiti quiaari na sequesacari. Na nuhuaji, Jesuuri nojori sequenu pacutequiaari:

—Sanajoorinia, seetanujanaa nia sequeyanija. Jiyano jiyajeneta casamiriaca pueyano quiniuria Pueyaso pueyano. ²⁵Taa camello maja na naata cuspuetaja cuhuoco tamajiria tajiniucuaani, naajuhaj, casamiriaca pueyano maja na naata tama na cuaqueyaja jiyatenu Pueyaso pueyano na quiniuria.

²⁶Na saquiriojoso pueya jaara na tojitiaquiaari, nojori socua jiyano jiuujiatere. Naatej, tama nojorijaaria nequesoreetooquiaari:

—¿Canteeri Pueyaso pueyano jiyatesaanutaniya socuanitioj?

²⁷Jesuuri nojori niquiri. Naa sequeeri:

—Pueyano maja na naata tamajaaja Pueyaso pueyano quini. Pueyano cutara na naata na jiyatenu na muerasura. Pueyaso, maja jiyajeneta casaa quini.

²⁸Pedroori Jesu sequeeri:

—Jiyaniijanaa, canaari puetunu canaa jiiitiasanojanaa tiujiaquiaari quia pueya canaa quiniuria.

²⁹⁻³⁰Jesuuri nojori riucaari:

—Seetanujanaa nia sequeyanija, shuquiriaatia quija quiniutaniya

cutara noo pueyano cante na jiiitiasano tiujiaja cua tojija na quiniucua, janiyajini pohuatana na quiniucua juhuaj. Cante na tia tiujajani, tapueyocua, na rimiatuhua, na queya, necohua, na cuhauriquiano, nojuajaari maninia miishaanutaniya quiarija mijiria na quishacarija. Nojuajaari socua jiyano queraatia niquitiosaanutanihua na tiujiasanoiniji.

Niquitiosaanutaniya tiaca, tapueyocua, na rimiatuhua, na nucua, necohua, cuhauriquiano. Naajuhaj, naquya miishano quiniutaniya cua tojija na quiniucua. Naajaa, na nuhuaji, pueyacaanu Pueyaso shuquiriaatia quiniutaniya quiarinia jiyajinia.

³¹Saniniujia, queraatia tojishano pueyari najuhua quija quiniutaniya Pueyaso, nojori tojiaquiniucua nojuaja. Saniniujia, Pueyaso ruetajacara, queraatia Pueyaso pueyari quiarija juha najuhua quija niquishano quiaa. Naajaa, nojori na nuhuaji seetanujanaa juha jiyaniujanucua quiniutaniya Pueyaso, na tojitajaca nojori quiniucua.

Jesu pacutesacarihua pohuatano nojuaja mosaanutaniya

(Mt 20.17-19; Lc 18.31-34)

³²Jerusalén tiacajinara nucuamaji nojori quiasacari, Jesuuri na saquiriojoso pueya puetariquia. Nojori na nuhuaji sacuariquia na puerenuta. Socua pueyari na nuhajituriquia nojori puerenutajuha. Nu cajiniocua, Jesuuri na doce saquiriojoso pueya jaatiaree tamocora tamajaaja. Tii nojori sequeriquiaari taa nojuaja miishaanutaniya, nojori tiuquishacari Jerusalén tiacajinia.

³³Nojori sequeeri:

—Niaacujaari niishiya, paa tari Jerusalén tiacajinia quiaani, tee cuniqui Pueyaso Nyanu niquitiosaanutaniya

pueyacuara secojonaa jiyaniijianucuaní, Moisés Rootasanojiní niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niquitosaanutaniyani. Janiyari jiyanoehua naquiya miishaanutaniyani. ³⁴Nojoriiri cua rerequetenutaniya. Cua riocojotunutaniyari. Cua piquitiuniutaniyajaarihuaj. Naa cua miishaanu nuhuajitij, nojoriiri socua cua monutaniya. Naajaa, jiuujiana-raca juucajinia, janiyari seetanujuanaa samiitianutaniuhuani.

**Santiago, tarajanu Juanta,
nojori sequesacari Jesu,
maninia nojori na miiniuria**
(Mt 20.20-28)

³⁵Na nuhuaji, Santiagoori, tarajanu Juanta Jesuucua catecanoquiiaari. Nojoriiri Zebedeo niquioehua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶Jesuuri nojori nequesotaree:

—¿Casaa nia paniya cua miiniuria niaarani?

³⁷Nojoriiri Jesu riuquaree:

—Pueyaso jaara quia jiyatere pueya jiyaniijiaara, quiocua canaa cajitijiore quia shuriucua, tamonu quia miaquetajara, tamonu quia muenecara, quia naacuna a canaa quiniuria.

³⁸Jesuuri nojori sequereee:

—Majaari nia niishini nia masesano. ¿Nia naatateeri rejeretanu naquiya miini taa cua miishaanutaniyacuaani? Naquiya cua miiniuri jiyanoehua noonu quiniutaniya juhua pueyano jaara mani noshianojinia tiuquinishaare.

³⁹Nojoriiri na riuquaree:

—Taaquiririni, canaa naatacuaaquiniateja naquiya miini rejeretanu juhua quiajaniya.

Jesuuri nojori sequereee:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanoehua naquiya na miishaanutaniyani, na cusosacari pueyacuara. Jesuuri naa nojori sequereee socuatej:

⁴⁰—Maja cutara cua naata niquitionu niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niquitosaanutaniya cutara, canra tari na jeenucuaaquaaricuaajani.

⁴¹Narta saquiriojosano pueya jaara tojiquiaari nojori masesano Jesu juucua, nojoriiri juaaquoiquiaari. ⁴²Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiitiaquiaa juhua na seya, tama nojori panishano na miiniuriajaaja nojoritia. Naajuhuaj, pueya jiyaniijianucuaari na jitiiasano pueyaca paaretaquiaa na cumaaca, tojishano pueya nojori quiniuria. ⁴³Niajaniya saniniuuja, majaari naa nia quiniu quiniutaniya. Cante tojishano pueyanora quiniu paniya niajanijajinijini, cuno cuaara jiyateera tama na cuaqueyajaaja juhua narta Pueyaso pueya serura na quiniuria. ⁴⁴Cante nia jiyaniijia quiniu paniyani, nojuaja cuaara quiriia narta Pueyaso muerasu cumaquinia. ⁴⁵Janiyajuhuaj, majaari mijiria cua niniu quiquiaari pueya cua poonijiotenura quiria, tama cua cuaqueya cua shuquiritiniuriajaaja. Janiya cutaraari niquiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeecasacari Bartimeo namijia
(Mt 20.29-34; Lc 18.35-43)

⁴⁶Nojoriiri jiyacari tiuquijioquiaari Jericó tiacajinia. Jesuuri cuno tiacajinij quiariquiaa na saquiriojosano pueyata. Queraatia

pueyari nata quiariquiaajuhuj. Jiyacaritij, tamonu cariojuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariojuaru na quiniucua. Nojuajaari maja na naata poonijionu quijia tamajaaja.

⁴⁷Nojuaja jaara tojiquiaari cuno tajiyo pueyano quiquiaari Jesu, Nazaret tiacajinijinio, nojuajaari naa nacanú coteeree:

—iJesunaa, Pueyaso Jiyarosanonaa, cucua quenaaja quia taraajereja!

⁴⁸Queraatia pueyari na tenujuriquiaa na sanaajanura juucua. Saaja socua nacaree jiyanoahuari:

—iPueyaso Jiyarosanonaa, cucua quia taraajere!

⁴⁹Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariojuaruuri naa sequesaaere:

—iQuia sanere! iQuia shuquiriri! iQuia sequeyacuaja! iNocua quia canujiyare!

⁵⁰Naa na tojishacaritij, cariojuaruuri na tucuaque toque jataquee. Ritia jaaqueeri Jesuucua na catecanonura.

⁵¹Jesuuri na nequesotaree:

—¿Casaa quia paniya cua miiniuria quiajaniani?

Cariojuaruuri na riucuaaree:

—iNiishitiojonanaa, niquijiaa quiniu paniuhuanijia! iCua namijia quia jeecarohua quiria!

⁵²Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniucua.

Jiyacaritij, cariojuaruuri tari na naata niquiniu quiriquiaa. Nucua Jesu nuhuajiyareeri.

Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

11 ¹Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiose Olivo cuhuariquia

tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ²Nojori sequereeri:

—Cuno tiacajinia nia quiaare, pa tაცი niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niquishiinioj, niocua na samaacartasee. Niocua na jaatucumohua miji.

³Pueya jaara naa nequesotare niajanija: “¿Casaa nia samaacartaanoj?”, niocua na sequere: “Jiyaniijia na paniya rupaquijia. Ritia na niquitionutanihuacuaja”.

⁴Nojoriiri quiojoquiaari. Burro riuriatatuseeri morotasano nuujinia, tamonu tia tohuateya shuriucua. Nojoriiri na samaacartasee.

⁵Tamasaca tii quiniaari nojori sequeree:

—¿Casaa nia miyani? ¿Casaa nia samaacartaa cuno burroni?

⁶Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari.

⁷Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii.

⁸Queraatia pueyari na toqueya muevoquiaari nucua, Jesuucua nojori maniniushitiniuria nuu. Tamasacaari jaamasucua piyotaquiaari cuhuariquiaajiniji, Jesuucua nojori niojotasocoriquiano na nucuaajuhuj.

⁹Jesu puetanaa, mariyata na nuhuaji nijionaari jiyanojua nacojonu coteequiaari nojori shuquiriniutia. Naa sequeturiquiaari:

—iPa shuquiritiare pa Jiyaniijia Pueyaso! iJiyanojua maniniacuaja pa Jiyaniijia, cuno, Pueyaso cumaacata tiuquiyani! ¹⁰iPueyaso cuaara na jiyateera maninia Jiyaniijia na quiniuria pajaniyara! iNojuajaari pa supuetanaa

jiyaniijia David niti pa jiitianutaniya maninia cutara! iJiyocuacaanu Quijia pa Pueyasocuaajaari pa shuquiritiasano!

¹¹Jesuuri naa tiuquiquiaari Jerusalén tiacajiniatej. Pueyaso Secojojua tiajinia tiuquishiiri. Na niquinijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosa-no pueyata. Jiyacaritij, tari tenacariiri quiriquiaa.

Jesu sesacasacari jajauju higo naana
(Mt 21.18-19)

¹²Tariqui, nojori quiojosacari Betania tiacajiniji, Jesuuri miaajeriquiaa.

¹³Tucuacaanuji niquirii higo naanaari queraatia jaamasucuaraca. Nocua canujiyareeri na niquiniuria seetanujua-naa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari.

¹⁴Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiari-quiaa naa na sequesacaritij.

Jesu jaacasacari seya niquitiojonaa
Pueyaso Secojojua tiajiniji

(Mt 21.12-17; Lc 19.45-48; Jn 2.13-22)

¹⁵Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapuee Pueyasocuaara puecoosocoriquiano seya niquitiojoriquiaa cumaneecaracujani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeeta-reeri, tee pueya tacatojoriquiaa taucuaa cumaneecacujani, Pueyaso Secojojua tiajinia niquitiojosocoriquiano cumaneecaracujani. Naajuhuj, Jesuuri mococoonu niquitiojonaa cajitiucua caponeetaree. ¹⁶Naajuhuj, majaari na

shanacunu quiquiaari pueya niyacunura najuhuaa Pueyaso Secojojua tia, na nitiootasano casamitia. ¹⁷Na nuhuaji, pueya niquiara niishitiojonu coteereeri. Naa sequereeri:

—Tariucuacaanu Pueyaso Rupaajinia naa naajiotasanocuaajaari quiya:

“Cua tia sesaari quiniutianiya,
Pueyaso Secojojua tia. Puetunu
jiyacajinijiniojuanaa pueya secojo-
nujuara quiniutianiari”.

Niaari saniniuuja na jiyatequiaari nohuasenuujuaca quiquiora.

¹⁸Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri roojotoo-quiaari taa na motunutaniya Jesuni. Saniniuuja, puetunu pueyajanaari jiuujiateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitiojosano. ¹⁹Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojiniji pohuatasano
(Mt 21.20-22)

²⁰Tariquicuaji, nojori shocosacari higo naana, na niquitiquiaariiri tariucua soreno, puetunu na nujuacatajanaa.

²¹Pedroori jiyacari Jesu sequesano niishiquii. Jesu sequereeri:

—Niishitiojonanaa, iquia niquiri! iQuia sesacasano higo naanaqui tari soreree!

²²Jesuuri nojori riucaaree:

—Pueyasocua nia tiuuri. ²³Seetanujua-naa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquiji. Quia jaataare shoniniacu caminiajinia”. Niaa jaara naa sequere seetanujuaanaa Pueyasocua nia tiuuniutia, niaari nia sequesano niquiniutianiya.

Naacuaajitij, Pueyasoočuaji nia taacanuya-quishacari, nia sequesanočuajaari tohuatenutaniya taa nia sequereecuajani. ²⁴Janiyari cunora nia sequeyani, puetunujuanaa nia masasano nia secojosacari Pueyasoni, nia niishiri niaa na jiitiaa tari. Na nuhuaji, niaari seetanujuanaa na masenutaniya. ²⁵Nia secojosacari, niaa jaara niishiquii niaa sesa quiya tamonu pueyanota, sesa na miiniuucua nijaniya, nojuaja nia jyanoori. Naacuaajitij, jiyocuaaanu Quijia nia Queeri nia jyanooniutianiya sesa nia miishanojiniji-jiuhua. ²⁶Niaa jaara jyanoyashijia quiriqia, jiyocuaaanu Quinia nia Queeri nia jyanoyaquiniutianiya, sesa nia miishanojiniji-jiuhua.

**Pueya nequesotasacari Jesu,
cante na jiyaronani**
(Mt 21.23-27; Lc 20.1-8)

²⁷Na nuhuaji, nojoriiri quiaquiaariuhua Jerusalén tiacajinihuya. Jesu rucuanajo-sacari Pueyaso Secojoua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaajuhua, narta Judiocuaca camarucuanio.

²⁸Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojoua tia jiyaniijia quia quiniuriani?

²⁹Jesuuri nojori riucaaree:

—Janiya nia nequesotanutaniya saniniunijia. Niaa jaara cua nequesotasano riucaare coteenucuaa, janiyari nia sequenutaniyajuhua cante cua jiyaroquiaari naa cua miiniuriani. ³⁰Cua riucaaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaare.

³¹Jiyacaritij, cuno pueyari jiyasohuaja tama juayonuutanu coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaarucua: “¿Casaara nocua nia tiuyaquiquianucuaarini?” ³²¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuaajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujiunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii.

³³Naacuaajitij, maja na naata na riucaatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhua, maja cua sequenu quiniutianiya nijaniya, cante cua jiyaroquiaari naa cua miiniuriani.

**Miriqui pohuatasano sesa
miijiaca poonijionaajiniji**
(Mt 21.33-46; Lc 20.9-19)

12 ¹Jiyacaritij, Jesuuri miriqui pohuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiajinia uva natoocuaari. Na nuhuaji, na shuriuquico matacoreeri. Naajuhua, saajia quejaquiaariiri uva rapijiojuara, na caaca reratesaanura. Jiyaconajara tiareejaariuhua, tiji na cuhuariquia na cojuajara nohuasejojuaacuaji.

Na nuhuaji, tamasa poonijionaa pueya na niquitioreeri nojori cojuasocori-quiano nera. Naacuaajitij, uva carojotasacari, nojoriiri nojuaja niquitio-nutaniya tijijiuhua, na camarujuanaa na quiniuucua. Na nuhuaji, nojuajaari tucuaaanu quiaquiaari, tii marijia na shocotejonura. ²Jaara tari quiquiaari uva carojotasacari, saniya cuhuariquia

camarujuaari na seru jiyaroquiaari cuhuariquia cojuanaa pueyacia. Na jiyaroquiaari cuhuariquia cojuanaa niqutionura nojori carojotasanojiniji, taa na camarujuaanaa pocoojoquiaaricuaa nojoritia tarijiani. ³Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. ⁴Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaree saajiata jasano. Na sesacatureejaariuhuj. ⁵Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijiniji-niojuanaani, tamasacaari piquishaaquiaari. Tamasacaari puecoosaaquiaari cutara.

⁶Cuhuariquia camaruuri saaja niquiri-yatujua niyanuniyojua jiitiaquiaari, jiyanojua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijiaaja: “Cuno pueya jaara niquiri cua niyanu, nojoriiri na tojiniutia-niya cutara”. ⁷Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—iNioori pa camarnu niyanu! Nio cuhuariquiaari tama nerajaaja quiniutia-niya, na que jaara cusoyare. iPa morej! iPocua nio cuhuariquia camaruhuaa quiquii tamajaajani!

⁸Cunora, na quiatureeri. Na motureeri. Na motunu nuhuaji, nojoriiri macu jatatee cuhuariquiajiniji tamama.

⁹Jiyacaritij, Jesuuri cuno pojori nequesotaree:

—¿Taa cuhuariquia camaru miiniutia-niya socuani? Nia sequereera pueyanaa. Nojuajaari cuhuariquia cojuanaa puecoo-nutaniya. Na nuhuaji, tamasaca pueya

niqutionutaniya cuno cuhuariquiaari, nera nojori cojuanura.

¹⁰¿Majateeri tariucuacaanu Pueyaso Rupaajinia nia serojonu quiquianucuaa nio? Naa sequeyari:

“Tiajonaa pueyari tamaatiujiajau saajia jatatee nojori tiasacari saijiniji tia. Na nuhuaji, cuno jatasano saajiaari socua cutara saajiara jiyatesaarojua tamasaca saijiniji. ¹¹Cunoori pa Jiyaniijia miishano. Pajaniyara, na miishanoori jiyanojua maninia. Nocuaaji jiuujiatesano”.

¹²Jiyacaritij, cuno Judiocuaca camaru-cuaari niishiricuaja miriqui Jesu pohuatasanoori tama nojorijinijiaaja quiriquiaa. Naaratej, nojoriiri Jesu quiatunu panirii juucua, nojori nujuateso-coriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaa-riuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajiniijiaaja pohuatariquiaa.

Jiya jiyaniijia cuaara pueyaracaanu niqutiosaaria na sequesano cumaneeca
(Mt 22.15-22; Lc 20.20-26)

¹³Na nuhuaji, Jesuucua jiyaramiqui-shaaquiaariiri noojiaqueya Fariseocuacajinijinio, Herodes panijiaa pueyajinijiojohuj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuaanaa sequeja. Majaari rimiajata quia niquiniu pueyajuhuj. Majaari pueya naata sapojonu quiajaniya. Quiaari seetanujuaanaa pueya jiuujia niquijia. Quiaa cutaraari seetanujuaanaa Pueyasojiniji niishitiojojua, taate pa naata maninia

quiniu Pueyaso niquiarani. Naaratej, canaa quia sequere, ¿maninate pa niquitiojonura pa cumaneecajiniji jiyaniija Césarra, taa cuno tahue sequequiaari pajaniyacujani? ¿Taa quia sequeyani, niquitiojoshiatee, maja soj?

¹⁵Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocori-quiano.

¹⁶Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquití nocuani? ¿Cana sesateeri nocua naajiotasanojaniuhuj?

Nojoriiri na riucuaare:

—Jiyaniija César naaquicuaaja, na sesajuhuj.

¹⁷Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niquitiore na camaru. Saniniuuja, Pueyaso nia niquitiore nerano tama na casaajaaja.

Jesu jaara naa nojori riucuaquiaariti, nojoriiri jiyanoahua jiuujiatequiaari.

¿Macunucuate samiitiaconutaniuhua?

(Mt 22.23-33; Lc 20.27-40)

¹⁸Fariseocuaca nuhuaji, noojiaqueya Saduceocuacajinijinoori Jesuucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

¹⁹—Niishitiojonanaa, supuetana Moisés cuajaari pa rootaa na naajioneejina, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti.

²⁰Tariija, tamonu pueyanoori niya

quiquiaari. Siete niquiohwaraca quiquiaariiri, saa canuuja. Jiyapueranuuri camiquiaari. Na nuhuaji, shaajequiaariiri muetuhujua. ²¹Naaratej, na nuhuajishanaari tarajanu mashiquio camiquiaari.

Nojuajaari muetuhujua cusoquiaarijuhuaj. Naajuhuj, jiyareta na nuhuajishanaari na camiquiaari.

Nojuajaari juhua tapueyocuaca cusoquiaari mueyajujuhuaj. ²²Cuno siete canuuri naa camiyoquiaari cuno maaji. Puetunu nojorijianaari cusunuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj.

²³Naacuajiti, macunucua jaara samiitacoroehua, ¿teyano cuno siete neyacaajinijiniote seetanu neyacajanaa quiniutianiya, puetunu cuno pojorijianaa jaara neyaca quiquiaari?

²⁴Jesuuri nojori riucuaare:

—Niaari jiyanoahua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio.

²⁵Macunucua samiitacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaca Pueyaso seya, maja camiyosano.

²⁶Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moisés cuaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

²⁷Naacuajiti, paari niishiyani Pueyaso pueya shaajeconoori saminiucua quia Pueyasora cutara. Pueyasoori maja

macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanhua jiyajeneya nia niishyaquiniucua Pueyaso Rupaa.

Puetunu Pueyaso Rootasanojinijijianaani, teyanote socua pa tojishocoriquianoni
(Mt 22.34-40)

²⁸Tamonu pueyanoori Jesu tojiriquiaa Saducecuaca rihuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

²⁹Jesuuri na riucaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuaajaari pa Jiyaniijiajanaa. Majaari tamonu quiniu socua. ³⁰Nia Jiyaniijia Pueyaso nia paniri puetunu nioojitajanaa, puetunu nia sohuanutajanaa, puetunu nia cumaacatajanaano”. Nio rootasanoori socua pa tojishocoriquiano puetunu Pueyaso rootasanojinijijianaa. ³¹Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³²Jiyacaritij, cuno Moisés Rootasanojiniji niishitiojonaari na sequeeree:

—Quiaacuaa maninia sequeeree, niishitiojanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua

tamonu quiniu juhua nojuaja. ³³Seetanujuanaa jiyanhua maninia cutaraari Pueyaso pa paniniuria puetunu poojiatajanaa, puetunujuanaa pa niishitijata, puetunu pa sohuanutajanaa, puetunujuanaa pa cumaacatanio. Naajuhua, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaca quirini, cunoori jiyanhua socua maninia Pueyasora, puetunu seya catijasanojinijijianaa nocuara, mariyata puetunu pueya niquitiojosano na casamijinijijianaa nera.

³⁴Jesu jaara tojiquiaari naa cuno pueyano riucaasano maniniatej, na sequeereeri:

—Quiaaqui quera Pueyaso pueyanora quia.

Na nuhuaji, majaari socua pueya nequesoreetanu paniniu quiriquiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵Jesuuri Pueyaso Secojoja tiajinia niishitiojoriquiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojanaa sequequiaacuaraarini: “Cristonaari supuetana David niquiohuacuajinio supuenutaniya”? ³⁶Pueyaso Sohuanu pohuatesacari supuetana David, nojuacuaajaari sequequiaari:

“Jiyaniijia Pueyasoori cua Jiyaniijia Cristo sequeeree: ‘Quia cajirijiaara cua miaquetajara, janiya cuaara quia paraa shocojotare quioacuajiatijia, Jiyaniijiajanaa quia quiniuria pueyaracaanu cutara’”.

³⁷Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jiyaniquiya “cua Jiyaniijata”.

Queraatia pueyari shanhua tojititariquiaa Jesu pohuatasano.

**Jesu sequesano Moisés Rootasano
niishitiojonaajiniji**

(Mt 23.1-36; Lc 11.37-54; 20.45-47)

³⁸Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaaja nojori rucuanenjotajara, pueya shootianura nojori. Nojoriiri timiquiaa pueya saruhuatascari nojori, nojori quishacari tiaca jiuujiajinia curotasano cajitiucuaajinia. ³⁹Nojori jaara masuusaare tamonu tiajinia queranacunura, nojoriiri ritia secoquiaa socua panishano cajitiujinia nojori cajitiuniuria tia camaru shuriucua. Naajuhujaj, Pueyaso secojojua tiacajiniaqueya pueya rerejosacari, nojoriiri camarucua cajitiucuaajinia cajitiuniu paniquiaa, pueya shootianura nojori. ⁴⁰Nojoriiri mashiquiopue tiaca masequiaa secaja cumanecata nojori na sapojonuta. Naa nojori miiniu nuhuajitij, nojoriiri Pueyaso secojoquiaa shitiarayocua pueya niquiara, maninia pueya nojori jiyanishaanura. Naaratej, Pueyaso saniitiosacari maninia miyashijaca pueya, nojoriiri socua jiyanhua naquiya miishaanutaniya tamasacajiniji.

**Casamiiju mashiquio niquitiosacari na
cumanee juuranee Pueyasora**

(Lc 21.1-4)

⁴¹Tamacari, Jesuuri cajiriquiaa Pueyaso Secojojua tiajinia cumanecaa niquitiojua tacoji, tee pueya niojoriquiaa na cumanecaa Pueyasoracuajani. Jesuuri tiji pueya shootiariquiaa na cumanecaa niquitiojiano. Queraatia casamiriaca pueyari queraatia cumanecaa niquitiojoriquiaa. ⁴²Jiyacari tiuquishijiaariuhua casamiiju mashiquio. Caapiqui cumanee-niojojua niasee cumanecaa

niojojuaajiniaari. Cuno cumanecaa na niasanoori maja puera cumanecaa na quiniu quiriquiaa. Saaja cobrejini^{*} shipinishano quiquiaariiri. ⁴³Jesuuri jiyacari na saquiriojosano pueya piirri. Nojori sequeeri:

—Seetanujuanaa nia sequeyanijia, nio casamiiju mashiquio cutaraari socua queraatia niquitioree puetunu tamasacajinijianaa. ⁴⁴Puetunu pueyajaanari na cumanecaa cureenoiniji niquitiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niquitioree cutara.

**Jesu sequesacari Pueyaso Secojojua
tia niyartasaanutaniya**

(Mt 24.1-2; Lc 21.5-6)

13 ¹Jesu tohareetasacari Pueyaso Secojojua tiajiniji, tamonu na saquiriojosano pueyajinijinioori na sequeere:

—Niishitiojonanaa, quia niquiri Pueyaso Secojojua tia, puereetujuaaca saitia tiasano. ¡Jiyanhua shanhua tia!

²Jesuuri na riucaare:

—¿Quiaateeri cuno shanhua tia niquiya, saijiniji tiasano jiyaconajani? Cuniqul, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiyari.

**Taa pa niishiniutianiyani
jiya puequesacari quera**

(Mt 24.3-28; Lc 21.7-24; 17.22-24)

³Na nuhuaji, nojoriiri quiojoquiaari olivo cuhuariquia tuhananuucua. Cuniqiji, maja puera tucuaanu quiquiaari Pueyaso Secojojua tia. Na taquijiraja quiquiaariiri. Jesu cajishacari tii, nocua catecaniquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

⁴—Canaa quia sequere taacari Pueyaso Secojojua tia niyartasaanutaniyani.

¿Casaa Pueyaso miiniutianiyani canaa niishiniuria quia sequesano quera tohuateya?

⁵Jesuuri nojori riuquaree:

—Tama nia cuaqueyajaaja nia cojuare tamasaca sapojiyaquiniuucui niajaniya.

⁶Nia numooteyacuajanijia, queraatia sapojonuujuaacari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷Niaa jaara tojiniuuri miaquetoojonuji-niji niya, tucuaaanujuhuaj, majaari najuhuana nia shiriiquitiuniu. Seetanujuaanaa naa quiniutianiyari. Naajaa, jiyacari, majaari jiya puequesacari quiniutianiya juhuanajuaja. ⁸Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajiniji miaquetoojonutaniya tamonu jiyajinijinio pueyata. Naajuhuj, rijiaari jiuuquiujiutianutaniya queraatia tiquiyocua tiacajinia. Jijanohua miaajesacariiri quiniutianiya jiyacari. Naajaa, puetunu nojuanaari saaja shusha naquiya miiniu coteesacari quiniutianiya.

⁹Tama nia cuaqueyajaaja nia cojuare. Niaari tama nia tiacajinia jiyaniijianucua-jaaja niquitiosaanutaniya saniitosocoriquiano. Naajuhuj, niaari Pueyaso Secojoua tiacajiniajanaa majacusaanutaniya. Niaari jiyatasaanuta-niyajuhua tiaca jiyaniijiaacua, jiya jiyaniijianucuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatate nojori niquiarajuhuj. ¹⁰Jiya puequeyaquishacarija, Pueyaso rupaari tari pohuatasano quiniutianiya puetunu jiyacajiniajanaa. ¹¹Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara

jiyacari Pueyaso Sohuanu niishitiojosano niajaniya. Nia pocuasanoori maja niajaniyajiniji quiniutianiya, nia pocuasacari nojori niquiara. Cunocujaari Pueyaso Sohuanu niishitishano quiniutianiya, na pocuatesacari niajaniya.

¹²Jiyacarijuhuaj, pueyanoori sesa miiniutianiya tama tarajanujuaaja, cua tojjia tarajanu quiniuucua. Tama tarajanujuaarija na niquitionutaniya mosocoriquiano. Jiyacaritij, pueyari tama necohuaaja miiniutianiya sesa, cucua tiuujiaca necohua quiniuucua. Naajuhuj, necohuari tama na queya tacartanutaniya monujuaaja, na queya tojiniuucua Pueyaso rupaa. ¹³Puetunu nio jiyajinijio pueyajanaari maja na niquiniu paniniu quiniutianiya niajaniya, cua tojitiajaca nia quishacari. Naajaa, cante seetanujuaanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quijiaara jatanishaanutaniya, pueyaracaanu cuata na quiniuria shuquiriaatia.

¹⁴Niaa jaara cuno jijanohua sacuaraa-tia casaa niquiri Pueyaso Secojoua tiajinia nujuatesano, taa supuetana Daniel* sequeya na naajioneejiniacuajani, niocua ritia mashiri. (Cante nio serojiyani, nojuaja cuaara niishiiria casaa na sequeyani.) Judea jiyajinia quiniiaa cuaara mashiiria ritia tuhuananuhuacua, cuno sacuaraaatia casaa jaara nujuatesaare Pueyaso Secojoua tiajinia. ¹⁵Canapuede jiyacari quiya na tia cacojiriani, nojori cuaara tiuquitiaaquiiria tiajiniaaco na casaa na riniuria juucua. ¹⁶Canapuede jiyacari quiya na cuhuariquiajiniani, nojori cuaara tacateyaquihuara na toqueya na poonuhua. ¹⁷Jiyacaritij, jijanohua taraatia quiniutianiyari maajipohua, nojori jaara manajaatohua quiya, jaara jiyacari jiitiare supuejaca conaajajuhuj. ¹⁸Nia secijosacari, Pueyaso nia maseriquia juhuacarijia, nia

mashiyocuatusacari cuaara quiaquiiiria shiniquia quishacari. ¹⁹Cuno quishacari, jiyanoehua naquiya miiniuuri quiniutianiya. Tariucuacaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuj, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. ²⁰Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocua jaari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹Jiyacaritij, tamasa jaara nia sequere: “Nia niquiri, Cristo tari niya quiya”, jaara sequerejuhuaj: “Nooj, jati quiyatej”, majaari na tojtianunoj. ²²Jiyacaritij, queraatia sapojonuujuaacari supuenutaniya. Nojoriiri sequenutaniya: “Janiyacua ja Cristoni”. Tamasacaari sequenutaniyahuaj: “Janiya Pueyaso sequenu panishano caminiuijuniani”. Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano
(Mt 24.29-35, 42, 44; Lc 21.25-36)

²⁴Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. ²⁵Riyari totenutaniya. Jiyocuacaanu cumaacaraca quijiacaari tetecatunutaniyahuaj. ²⁶Jiyacari, janiya Pueyaso Niyanuuri niquishaanutaniya jiyocuacaanuji roseyano cohujajiniani, jiyanoehua shacantuua cua cumaacata. ²⁷Jiyacaritij,

janiyari cua seya jiyaramiquiniutianiyanij nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiniujuanaa rerejotesaanutaniya, socua jiyanoehua tucuaacaanu jiya cajiniocua puequeetujinijinio.

²⁸Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratuumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹Quiarijia saniniuuja, naatej taa nia niishiquiaa higo naanacuaani, niocua naa niishirijihuaj janiya quera tiuquihuani, niaa jaara puetunu cua pohuatasanojuanaa niquiri tohuatayano. ³⁰Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quinaa pueya cusonuyaquishacarijia. ³¹Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³²Maja cutaraari nia niishiniu taacari cua tiuquiniutianihuanu, casaa juucatej. Majaari jiyocuacaanu quijiaca Pueyaso seya niishiniujuhuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niquitiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuanu. ³⁴Cunoori quiniutianiya juhua tamonu pueyano quianu panishacari tamonu jiyajiniara tucuaacaanu. Na quianura, nojuajaari na seya seerataaree maninia nojori cojuanura na tia. Tamasaca niquitioyaree na poonijosanoori, nojori

poonijiosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuarajaatijia. ³⁵Naaratej, nia sutere. Maja maquenuujunu. Majaari nia niishiniucua-ja taacari tia camaru tiuquiniutianihuani, shusha ninishacari, shiyaqueya, caacaraja niunijiosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. ³⁶Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacariuhua niaacua. ³⁷Cua sequesano niajaniani, cunoori puetunu pueyarajanaa: “iNia sutereja! iMaja maquenu!”

**Judiocuaca camarucua roojotoosacari
nojori quianura Jesu**

(Mt 26.1-5; Lc 22.1-2; Jn 11.45-53)

14 ¹Jiyacari, juhuanojuaja querajaa juuca quiriquiaajaari Pascua* juucara queranacunura. Pascua juucaju-huaj, poreetajaaju shipinishano pan* miaquenu coteesaaquiaari siete juucara. Pueyacuara secojona jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quietunutaniya Jesu jiyasohuajani, na motusocoriquiano.

²Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajaanaa juaatiriiri.

**Tamonu maaji totasacari na shanohua
jaanutaja Jesuucua**

(Mt 26.6-13; Jn 12.1-8)

³Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitianiyojua shucuariquiaja pataconioyo-

jua cacatariquiaari, shanohua cohuaaja saajiajiniji quejasano. Mishaja quiriquiaari shanohua jaanutajata, nardo jaamasucuajiniji shipinishano. Jiyanojua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconioyojua cocuatatee, na totanura Jesu nacaacua. ⁴Tamasaca tii quiniaa pueyari juaarii naa cuno shanohua jaanutaja niitiasaanuucua. Tama nojorijiaarijia sequetooriquiaa:

—¿Casaara cuno shanohua jaanutaja niitiasaaree najuhuanani? ⁵iCuno jaanutaja maara niquitiosaacanu queraatia cumaneecara, casamijiuniucua niquitiosocoriquiano!

Nojoriiri juhuacatecara cuno maaji juaarii.

⁶Jesuuri nojori sequeree saaja:

—iNia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyanojua maninia quiria. ⁷Casamijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniuuja, maja cutaraari cua quiniu quiniutianiya pueyaracaanu niaata. ⁸Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹Seetanujuanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhaaj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quietenura

(Mt 26.14-16; Lc 22.3-6)

¹⁰Jiyacaritij, Judas Iscarioteeri quiaquiaari pueyacuara secojona

jiyaniijianucuata roojotoonura taa nojori na quiatenutaniya Jesuni. Nojuajaari Jesu saquirojosano pueyajinijinio quiquiaari-jiuhuj. ¹¹Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanhua shuquiririi. Nojoriiri Judas sequeree:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiari taacari nojori na quiatenutaniya Jesuni.

**Jesu miaquesacari na
nuhuajiria na pueyata**

(Mt 26.17-29; Lc 22.7-23; Jn 13.21-30;

I Co 11.23-26)

¹²Puetunu marijiarajanaa, Judiocuacari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara riuriotaca borregohua, Pueyaso niquiara miaquenuusocoriquiano. Naaratej, Pascua juuca quishacari, Jesu saquirojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiariria Pascuarani?

¹³Jiyacaritij, Jesuuri caapiqui na saquirojosano pueyajinijinio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. ¹⁴Jaara tiuquishii tiajinia, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquirojosano pueyata quiariria Pascua niucuan?’” ¹⁵Jiyacaritij, nojuajaari nia niqitiniutaniya puereetuca sohuaca, jiyocuacaanu nataco, tariucua maninia

jeenucuasano. Niocua cuniqui borrego majeetese, niucua pa miaquesocoriquiano.

¹⁶Na saquirojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetese borrego, Pascuara miaquesocoriquiano.

¹⁷Jaara niniquiaari, Jesuuri tiuquijioseere na saquirojosano doce pueyata. ¹⁸Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹Jesu sequesacari naatej, nojoriiri jiyanhua taraajequee. Jiyacaritij, tama nojorijiaariria na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojorijianaari naa na nequesotaree.

²⁰Jesuuri nojori riucaaree:

—Niquiriyatujua doce niajanijajinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. ²¹Janiyacujaari maninia tohuateenutaniya puetunujuanaani, taa tariucuacaanu Pueyaso Rupajinia janiyajiniji naajiotasaquiaaricuajani. Saniniuujia, jiyanhua taraatia quiniutaniyari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²²Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqitiojoreeri. Na niqitiojosacari, naa miriqui sequequiaariiri:

—Jajaa. Nia miaquere. Nioori cua cuaqueya.

³⁷Na secojonu nuhuaji, na saquiriojosa-no pueyacu tacateyarohuari. Nojori riuriatasuhua maquetiuyanoori. Jesuuri Pedro sequeeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuaanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria niajaniya maninia nia miniuria.

³⁹Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰Na nuhuaji, socua tacatequiaariuhua na saquiriojosano pueyacuari. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutanianoj. ⁴¹Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? iTariucuaja! iQuiarijia cutara janiyari sesa miijiaa pueya quiatesaanutaniani, nojori miiniuria janiya taa nojori panitiuyacuajani! ⁴²Nia saneecuatire. Pa quiaare. Cua quiateriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijiuhua. Queraatia pueyari Judasta nijioquiaari. Cuno pueyari nijiniaquetucujaa mueruu pooriquiaa, macacanio. Cuno pojoriiri pueyacuara

secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judiocuaca camarucua jiyaramiquishano. ⁴⁴Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocujaaari nojuaja. Niocua na quiaasee. iNiaari maninia morojosano jaatucutaarohuaquinioj!

⁴⁵Naacuajitij, Judas jaara tiuquiquiaari Jesuucua, nocua catecanoquiaariiri. Na sequeereeri:

—iNiishitiojonanaa!

Jiyacari na nujuureeri. ⁴⁶Judasta nijionaa pueyari jiyacari Jesu quiaasee. Morojosanoori jaatucutashiyarohua.

⁴⁷Cuniqui Jesuta quiniaa pueyajinijiononi, niquiriyatu nojorinijinijioori na shuucujaji shitiaquiaari nijiniaquetucujaa mueruu. Nata jaateree pueyacuara secojonaa jiyaniijia seru numocoori.

⁴⁸Jesuuri nocua nijionaa pueya sequeeree:

—¿Casaara cucua nia nijioree nijiniaquetucujaa mueruutani, macacatanio, morojosano nia riniuria janiya juhua nohuasejojuani? ⁴⁹Janiyacuajaari puetunu juucajanaa nia tatinia quiquiaani, Pueyaso Secojoua tijania cua niishitiojosacari pueya niquiara. Majaari tii cua quishacari nia quianu quiquianu janiya. Naajaa, naa nia miiriqui, tariucuacaanu janiyajiniji Pueyaso Rupaajinia naajiotasano tohuateenura.

⁵⁰Jiyacaritij, puetunu Jesu saquiriojosano pueyajanaari na shuriucuaji mashiyocuatuquiaari. Tamajaaja Jesu tiujiatuqueeri.

⁵¹Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetueque lino toquerauta cuhuajaatiariquiaa. Jesu

quiatunaa niquishacari nojuaja, na quiatureejaariuhuj. ⁵²Nojuajaari saaja na toque tiujiaquee nojori juaashiquiajinia. Juhuasuuri ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

Judiocuaca camarucua

nequesoreesacari Jesu

(Mt 26.57-68; Lc 22.54-55,63-71;

Jn 18.12-14,19-24)

⁵³Jesu quiatunaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojonaanio. ⁵⁴Pedroori Jesu nuhuajiquiaari tucuaaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia cajishiiri. Mami jitiuriquiaa nojoritia cuniquiiri.

⁵⁵Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. ⁵⁶Queraatia pueyari nocuara tonujuriquiaa juucua, nojori sapojonuta. Nojori saquiriojotasanoori saaja rimiajata quiriquiaa puetunujuanaa. ⁵⁷Na nuhuaji, tamasaacari sanetaquiaari nocuara nojori tonujunura na sapojonutajuhuj. Nojoriiri naa sequetuquiaariti:

⁵⁸—Canaa na tojiquianu sesa sequeyanoni. Naa sequecanuuri: “Janiya nio Pueyaso Secojojua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucuatanutaniuhuan. Cunoori maja pueyata tiasano na quiniu niiniutianiya”.

⁵⁹Nojori saquiriojotasanoori saaja rimiajata quiquiaari jiyaniijianucua niquiara.

⁶⁰Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? iQuia tojiri, pueyaruhua quiocuara tonujiya!

⁶¹Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶²Jesuuri na riucuarere:

—Jaa, nojuacuajanijia. Niaari cua niqiniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niqiniutianiya tacatehuano cohuajajinia jiyocuacaanuji.

⁶³Pueyacuara secojonaa jiyaniijia jaara tojiquiaari naa Jesu sequesanootej, tama na toquejaaja sutaree na juaaniutiaari. Sequereeri:

—¿Casaara pa sashiya tamasa saquiriojotanura saa nocuarajaaraniuhuj? ⁶⁴Niaacuaja shusha tojirii Pueyasocucua na sequesano sacuaraatia. ¿Niajaniyarijataj, taa nia niishiriojiyani? Puetunu pueyajanaari sequequiaari: —iCuaara mosaaria!

⁶⁵Jiyacaritij, tamasaacari Jesu riocojonu coteequiaari. Na jiquioco morotureejaariuhua maja na niqiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini? Secojojua tia cojuanaa pueyari na jiquioco piquitiurijihuj.

Pedro seetasacari Jesujiniji

(Mt 26.69-75; Lc 22.56-62; Jn 18.15-18,25-29)

⁶⁶Pedroori jiyaniijia tia carijiniacuma quiriquiaa. Jiyacaritij, tamonu niyacoori rucuanajoriquiaa carijiniacuma. Nojuajaari pueyacuara secojonaa jiyaniijia seru quiquiaari. ⁶⁷Pedro

niquishii cajiyanoori, mani jitiuyano.
Tacuriitia na shootiariquiaari. Na nuhuaji
na sequereeri:

—Jaj, quiaacuaruhua Jesuta rucuane-
jojuajuhua, cuno Nazaret tiacajiniinio
pueyanotani.

⁶⁸Pedroori na seetaree. Na sequereeri:

—iCuno pueyano maja cua niishishano!
iMajaari quenaaja cua niishiniu casaa
quia sequeyani!

Pedroori canujiyaree. Mataca tohuat-
eyaji nujuaseeri. Caacarajaari jiyacari
niunijioree. ⁶⁹Cuno niyacoo jaara Pedro
niquiquiaariuhua socua, juhuacatecara
nata quiniaa sequereeri:

—iNio pueyanoori cuno Jesu pueyajini-
jiniujojuaj!

⁷⁰Pedroori socua na seetaquiaari.

Pasaja na tarishishacari, cuniqui nata
quiniaari Pedro sequeree socua:

—Seetanujuanaa, quiaari cuno pueyaji-
niniinio. Quiaacujaari Galilea jiyajiniinio
pueyano. Canaa tojishacari quiajaniya,
quia pocuanuuri juhua nojori pocuanujua.

⁷¹Pedroori socua jiyanhua sapojonu
coteequiaari. Naa sequereeri:

—iPueyaso cuaara saniitioora janiyaqui,
janiya jaara sapojiyani! iSeetanujuanaa,
maja cua niishiniu cuno pueyano,
canajiniji nia nequesoreetaacuajani!

⁷²Jiyacaritij, caacarajaari niunijionu
pacuterohuacuhua. Pedroori jiyacari
niishiquii naa Jesu sequesano nojuajatej:
“Juhuanujoaja caacaraja niunijionu
pacutejiyaquishacarijia juhuaquenu
panishacari, quiaari janiyajiniji tari
seetanu pacutejonutaniya”. Pedro jaara
niishiquii naa Jesu sequesano nojuajatej,
jiyanohua nujuquequeeri.

Jesuucuaa pueya saquiriojotasacari Pilato
(Mt 27.1-2, 11-14; Lc 23.1-5; Jn 18.28-38)

15 ¹Tariquicuaji, pueyacuara
secojonaa jiyaniijianucuaari
rerejoquiaari Judiocuaca camarucata,

Moisés Rootasanojiniji niishitiojonaataju-
hua, Sanedrín* maanutanio. Nojoriiri
moronucua Jesu jaatucutaquiaari Pilato-
cua*. Cuno Pilatocujaari Judea jiya
jiyaniijia quiquiaari. ²Pilatoori Jesu
nequesotaree:

—¿Quiaate Judiocuaca jiyaniijia?

Jesuuri na riuwaree:

—Jaa. Naacuaaquiniatejaj, taa quia
sequereecuajani.

³Pueyacuara secojonaa jiyaniijianu-
cuaari Jesuucuaa tonujuriquiaa
queraatia sesa casaa. ⁴Pilatoori Jesu
nequesotarohuacuhua:

—¿Majateeri quenaaja quia riuquanuu-
jua? Quia tojiri taa cuno pojori
saquiriojotaa quiocuarani.

⁵Jesuuri maja na riuquanu quiriquiaa
quenaaja. Cunora, Pilatoori jiyanhua
jiujujiatequiaari.

Na paraa sequesacari Jesu cuaara mosaaria
(Mt 27.15-31; Lc 23.13-25; Jn 18.38-19.16)

⁶Puetunu marijjarajanaa, Pascuara
queranacunu juuca, Pilatoori nujuatesano
pueyano tohuataniniuo jiitiquiaari nujuate-
jojuajiniji, cana pueya paniquiaari na
cartesaanuracuajani. ⁷Jiyacaritij, tamonu
pueyanoori nujuatejojuajinia nujuariquiaa.
Na sesa quiquiaari Barrabás. Nojuajaari
tamasaca pueyata pueyano moquiaari.
Cunoori quiquiaari nojori juaashacari,
Romano taucuaa jiyaniijia jiitianuucua
Judiocuaca. ⁸Pilato nequesoreesacari Jesu,
jiyacaritij, queraatia pueyari Pilatoocua
nijioquiaari naa nojori secojonura nojuaja:

—Pueyano quia carterohua nujuatejo-
juajiniji, taa quia miiquiaacuaja puetunu
marijjarajanaani.

⁹Pilatoori nojori riuwaree:

—¿Cana nia paniya cua cartenurani?
¿Niaate niarta Judiocuaca jiyaniijia
paniya cua cartenura?

¹⁰Nojuajaari tama niishiquiaarijiaaja,
pueyacuara secojonaa jiyaniijianucuaari

Jesu niquiniu paniyaquiquiaari pueya shocotenuucua nojori saniniujia Jesuucua. ¹¹Pilato nequesotasacari nojori, pueyacuara secojonaa jiyaniijianu-cuaari jiyacari pueya shiniujuiquiaari nojori sequenura Pilato, nojuaja cuaara carteera Barrabás. ¹²Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³Nojoriiri naa nacaree jiyanhua:

—iCuaara mosaaria niyacutesanojinia teetesano!

¹⁴Pilatoori nojori riucaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanhua nacaree:

—iNiyacutesanojinia quia teetere!

¹⁵Pilatoori socua tariniquiaari.

Nojuajaari maninia quiniu paniquiaari Judiocuacata. Cunora, Barrabás carteree-ri. Saniniujia, Jesu majacuteree cutaraari. Na nuhuaji, na soldadohua na niquitioreeri, niyacutesanojinia na teetsaanura.

¹⁶Jiyacaritij, soldadohuari Jesu jaatucu-quiaari jiyaniijia Pilato tiajiniaaco.

Nojoriiri puetunu narta soldadohuajanaa rerejoteree Jesu shocua. ¹⁷Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaa-reejaariuhua na nacaquera. ¹⁸Na nuhuaji, nojoriiri na rupaa paaretanu coteequiaari Jesu na macaatinuria:

—iJejee, Judiocuaca camarnuna nooj!

¹⁹Nojoriiri na naca piquirii naajuata. Na riocojotureejaariuhuj. Nocuara mojoquetacoreeri juhua jiyaniijiajanaa cariquimajia, nojori sapojonuta na macaatinuria nojuaja. ²⁰Naa na rerequetesaanu nuhuajitij, toque naatuqueeri nocuaji jocusaaquiaari. Tama na

toquejaaja cushitishaarohuari. Na nuhuaji, soldadohuari na tohuataniquiaa-ri. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹Soldadohua jiyatasacari Jesu, tamonu pueyanoori jiyacari tacateriquiohua na cuhuariquijini. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²²Jesuuri shiitianiyojua tuhuananuucua jiyatasaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”.

²³Soldadohuari Jesu raatequiaari vino juucua, mirrata* cojitishano. Saaja na ratuyaquiriiri. ²⁴Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijio-quiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraattiaquiaari tama nojoririajaaja.

²⁵Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷Jiyacaritij, caapiqui nohuasenuujuacaari Jesu shuriucua teetejosaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara.

²⁸Naa tohuateequiaariiri taa tariucuaa-nu Pueyaso Rupaajinia na naajiotasaaquiaricuajani. Naa sequeyari: “Na sesaari sesa miijiaca pueya sesacata cojiritiasaaquiaari naajio-tasaanujuhuj”.

²⁹Pueya tajishacari nucuaco Jesu shuriuquico, nojoriiri na macaatiquiaari. Na maanuquenuta naa na sequetuquiaa-riiri:

—¡Jaj! ¿Majateeri quiajaniya cumaaca-racacuaaja? ¿Quiaateeri jiyaniiriquiaa, quiaa jaara Pueyaso Secojoua tia niyarta-re, quia naata na tianu tucuatenuhua jiuujianaraca juucajinia? ³⁰Quiaa jaara naa cumaacaraca quiriritij, niyacutesanojiniji quia roserecuarajaj.

³¹Pueyacuara secojonaa jiyaniijianucua, Moisés Rootasanojiniji niishitiojonaari na macaatiquiaarijiuhuaaj. Tama nojoriijaari-ji naa sequetooquiaari:

—¿Maatucua saa tamasaca naatanijiori-quiajaari? Tama nojuaja cutaraari maja na naata niyacutesanojiniji rosenu.

³²Jaara seetanujuanaa quiri Pueyaso Jiyarosano, pa jiyaniijia na quiniuria, cuaara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenujuaca Jesu shuriucua teetejosano quiriquiaani, nojoriiri na sesacariquiaajuhuaaj.

Jesu cusosacari

(Mt 27.45-56; Lc 23.44-49; Jn 19.28-30)

³³Panacari, jiyari ninishiquiria quiquiaari puetunujuanaa. Tarishiquiaa-riiri. Shusha tenacariishacari cuhuatemohuari. ³⁴Jiyacaritij, Jesuuri jiyanoehua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵Na shuriucua nujuatunaa tojitiasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioo-nuyano, nocua na niniuria!

³⁶Tamonu pueyanoori ritia netequiaari namasu casaa na shiniuria jereeca

vinoinia. Na nuhuaji, na morotaree naajuaacuaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

³⁷Jiyacaritij, Jesuuri jiyanoehua na rupaa paaretarohuacuhuaaj. Cusoqueeri.

³⁸Jiyacaritij, Pueyaso Secojoua tiajinia-cuma, shiquiquia toquejiniji sohuacaari sutequee tamajaaja, jiyocuaaanuji jiyocua. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasoocua nojori tiuquishacari juucua, jiyanooshoojua nojori quishacari. ³⁹Cuno Romano soldadoehua jiyaniijiaari Jesu tajoji nuuariquiaa. Na niquishacari taa Jesu nacaquiaarini, naajuhuaaj, taa Jesu cusoquiaari na rupaa na paaretanutani, jiyacariti nojuajaari naa sequeeree:

—¡Nio pueyanoqui seetanujuanaa Pueyaso niyanu!

⁴⁰Maajipohuari tii quiriquiaajuhuaaj. Tucuaaanuji Jesu shootiaturiquiaari. María Magdalenaari nojoritia quiriquiaa-juhuaaj, socua narta maajipohuanio. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji. ⁴¹Puetunu nio maajipohua-janaari Jesu nuhuajiniaa quiquiaari. Nojoriiri nera pueraquenuuna quiquiaa-ri, Galilea jiyajinia na quishacari. Socua queraatia maajipohuari tii quiriquiaaju-huaaj, canapuede Jerusalén tiacajiniara nijioquiaari Jesutacujani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴²Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuu-

jia, tariqui quiquiaariiri samaatenu juuca. Cunora, pueyari juhuacarijia jeenucua-quiaari puetunujuanaa. ⁴³Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín* pueyara. Joseeri mijiria Pueyaso Jiyarosocoriquiano niquiniuucua jiaatiata quiquiaarijuhuaj, canaa Jiyaniijajanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴Pilatoori jiyanhua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵Soldadohua jiyaniijia jaara na riucaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶Joseeri jiyacari shanhua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuniooreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanhua puereetuca quejasano saajiata. ⁴⁷María Magdalena, José nucua Marfánio, nojoriiri na niquitariquiaa tee na niasaareeni.

Jesu samiitiasacariuhua

(Mt 28.1-10; Lc 24.1-12; Jn 20.1-10)

16 ¹Samaatenu juuca jaara shocoquiaari, María Magdalena, Santiago nucua Marfajuhaj, Salomeenio, nojoriiri shanhua jaanutaja masequiaari macuucua na tuujutasocoriquiano.

²Jiyanhua tariquicuajji Domingo* juuca, shusha pananu metasacari, nojoriiri raajinia quiojoquiaari. ³Nucuaco na

quiojosacari, tama nojoriijaarijia sequetooriquiaa:

—¿Canteeri pocuaji shuquitiniutiani-ya tamocora raa tiootiuni?

⁴Nojori jaara niquiquiaari raa, saajia niquitiuriiri tariucua tamocora shuquiti-shano. Puereetuca saajiaari quiquiaari raa tiootiu. ⁵Nojoriiri raaco tiuquitiamaa. Mashaja niquitiushiiri tii cajiyo nojori miaquetajara, cohuaja tucuaque toque cajitiaano. Nojoriiri jiyanhua shiriiqui-tiuquiaari na niquitiushacari nojuaja. Cuno mashajaari Pueyaso seru quiriquiaa. ⁶Maajipohua sequereeri:

—iMaja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetesaarucuaani. iNojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niquiniutianiya, taa na sequecanu niajanayacuajani”.

⁸Maajipohuari netecutuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasaca pueya na sequetunu quiquiaari na puerenuta.

Jesu metasacari María Magdalenaacua (Jn 20.11-18)

⁹Jesu samiitianu nuhuaji, cuno Domingo juucaja, shusha semaana* coteenu juucani, Jesuuri coteenujuanaa muetaquiaari María Magdalenaacua. Jesucuaajari tarijia siete samaruhua tohuatanijioquiaari cuno Marfajiniji.

¹⁰María Magdalena niquiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹María Magdalenaari nojori sequese:

—Pueyanaa, iJesu tari samiitiarohua!
iJaniya na niquiriini!

Nojoriiri Marfa sequesano cuaracashitirii saaja.

**Jesu muetasacari caapiqui na
saquiriojosano pueyacua**
(Lc 24.13-35)

¹²Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. ¹³Nojori niishishacari nojuacuaja Jesu quiquiaari, nojoriiri ritia riujiuuquiaarihua tamasaca nojorijinijinio nojori numootenuhuara. Naajuhua, Jesu saquiriojosano pueyari nojori pohuatasano cuaracashitirijuhua.

**Jesu rootasacari na
jiyaramiquishocoriquiano pueya**
(Mt 28.16-20; Lc 24.36-49; Jn 20.19-23)

¹⁴Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niquiriini, samiitiarohuacuaaqui”. ¹⁵Na nuhuaji, Jesuuri nojori sequeeree:

—Nia quiaare puetunu jiyacajinijanaa, janiyajiniji Pueyaso rupaa nia pohuata-nura, puetunu nia pohuatasanoocua tiuujiaa pueyapuejanaa jiyanooshaanura. ¹⁶Cante moojinia tiuquinishiya

Pueyaso rupaacua na tiuuniuucuan, Pueyasoori na jiyatenutaniya na pueyanora. Saniniuujia, cante Pueyaso rupaacua tiuyaquiyaani, nojuajaari saniitiosano quiniutianiya. ¹⁷Cucua tiuujiaacari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacujitij, cucua tiuunaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiyaajuhua. ¹⁸Naajuhua, niaa jaara soconu sajitishaare, niaa jaara casaa raatesaarejuhua nia cusojua-saanura juucua, majaari nia cusun quiniutianiya. Naajuhua, cusosuhucua nia niasacari nia juaashiquia, cusosuhuari naataconutaniuhua.

**Jesu tacasacariuhua jiyocuaaanu
na Queecua**
(Lc 24.50-53)

¹⁹Na pocuanu nuhuaji, Jiyaniijia Jesuuri tacanishaaquiaariuhua jiyocuaaanu. Nojuajaari Pueyaso miaquetajara cajiquiaariuhua. ²⁰Na nuhuaji, na saquiriojosano pueyari quiojoquiaari Pueyaso rupaa nojori pohuatanura puetunu jiyacajinijanaa. Jiyaniijia Jesuuri pueyaracaanu nojori cumaquiriquiaa. Pueya niqitirijiaariuhua na cumaacata na pueya miijosano, pueya niishiniuria maatia, Jesu jiyaramiquisha-no pueya pohuatasanoori seetanu rupaajanaa.